



桂宮誌

四

ハ 6
2477
3



八二八
2477
6.3

桂宮誌卷之四目錄

天輔編

龍門函

重申陰隲文

又示陰隲文

勸孝文

救世文

勸行社倉文

勸敬字紙文



附惜字律

鱣壇勸世文六則

曉世文

示行致善籍功過格訓文

命高名望等宣示訓世文

戒士子文五則

勵士文

諭師文

有序

養性文

養性法

勉學文

勸忠孝文

戒意惡文

戒口過文

救劫文

指示善惡關頭文

訓法天道文

治家宜勤儉文

敬五穀文

警世文三則

誠諭文

消劫啓運濟世勸善文

諭清淨壇文

戒溺女文

禮神明文

宏敷文

諭洗心文

敬祖宗文

敦倫文

欲貴子須積德文

富貴原從善感來文

訓士子文二則

選士文

科場選士敕令文

諭公善堂諸士文十九則

戒無相壇諸士文二則

立德莫先修身文

不為淫書所惑文

訓希聖堂諸士文

撫躬文

諭諸生檢身要文

桂宮誌卷之四天輔編

安南徐 珽彙輯

鷄林李培根校訂

龍門函

重申陰隲文

士風之敗今世甚矣於親而存計較之私於國而樹肥家之計狠戾不仁狼藉殆盡嗚呼士為四民之首反不如田家子而知孝親敬長矣安睹所謂陰隲哉夫陰隲者原為俗人立言非所以教士子也士子讀



書談道不可有計功懷利之心如曰此爲陰隲而可爲彼非陰隲而不爲然則事父所以報恩忠君所以立節豈爲陰隲而始爲忠臣孝子也耶獨是世風日薄陰隲且不能動人况不言陰隲者乎故重將陰隲爲爾多士告爾等學尙未明便思僥倖一有不得輒怨主司好闢佛老以爲高日無鬼神以爲正事親未盡孝思聊奉養則曰竭力爲國一籌未展偶失職則敢議君積日廢弛終朝狂悖甚至濫厠青衿便日無官長初登黃甲則樹志肥家無仁無義不忠不孝喪

心已極陰隲何存各宜革故從新洗心滌慮在堂須盡孝養之誠柔聲下氣毋謂已行之是旣沒宜行三年之禮寢苦枕塊勿圖宴樂之歡過墓廬而增悲望羔豚而色慘立心之始莫此爲先至於姻黨族屬最易形於嫉妬惡緣相結毒及於天尤宜戒慎鄉里勿恃傲滿之才考試勿入奔競之路旣入黌宮而讀書切勿包攬詞狀以破人家以奪人產以損己德以喪己名初登仕路以修身切勿接見官司以假威權以遂私欲以助奸惡以害良民婦女非我有雖可愛而

勿淫老幼非一家宜懷仁而顧恤首戒一切言語文字之禍以杜敗德殺身之機毋負才名而自滿毋恃家勢而自矜禽魚宜放勿囚時日宜惜勿怠媚優勿狎奴僕勿殘神明宜敬而遠毋爲諂瀆鬼神天地甚尊而高毋得謗詈日月月下行淫露中裸體皆來首惡之誅各宜謹戒香閨私婢繡閣憩奴共登必譴之條悉當慎守妻室宜和兄弟當睦毋奪產而爭毋得新而棄毋久淹親樞毋暴殄天物各存報本自勵之思自有天相吉人之應科名必顯首領自全否則縱

獲一時僥倖之榮終受革職喪身之禍神明不爽天聽惟聰此皆士人之切病特反復以申言人果遵信自邀天眷如其玩忽必有天殃爾諸生凌克畏張之達金廷玉及紹熙等喜讀吾陰騭之文而不知其義吾故降授此言宜恪守奉行廣爲傳諭以勵多士倘持行誠篤吾當許爾科名欽哉特諭

又示陰騭文

帝君又曰敬畏上天施仁施惠舉才薦賢饒人責已掩人之非若聞父母之諱見人之過必須正色以規

談道義而化姦頑講經文而曉愚昧減食救獄囚之
餓捨財賑乞丐之貧造漏澤之仁園興啓蒙之義塾
依本分而致謙恭守規矩而遵法度諧和宗族解釋
怨冤常記有益之語罔談非禮之言存平等心擴寬
大量全四德忠孝悌信以敦人倫正一心而集衆善自然
福長災消必定身安壽永貲財富有來滾滾之源泉
子孫賢良延縣縣之瓜瓞他時歸去不墮三途再世
受生咸臻五福叮嚀數語普勸世人造惡者名書黑
籍爲善者字列青編纖悉不遺分毫莫爽神明有感

報應無差心上行持空中鑑察

勸孝文

今日是元旦爲人間第一日吾當說人間第一事何
爲第一事孝者百行之原精而極之可以參贊化育
故謂之第一事赤子離了母胎在孩抱便知得故謂
之第一事舍此一事並無學問舍此一事並無功業
舍此而立言則爲無本之言舍此而能功蓋天下到
底不從性分中流出必作僞以欺國負本以滅身天
地是孝德結成日月是孝光發亮孝之道言不可得

而盡也爲人子者事富貴之父母易事貧賤之父母
難事康健之父母易事衰老之父母難事具慶之父
母易事寡獨之父母難夫富貴之父母出入有人扶
持居止有人陪從其願常給其心常懼貧賤之父母
捨却白髮夫妻誰爲言笑離了青年子媳莫與追隨
人子一日在外父母一日孤栖爲人子者善體其情
能頃刻離左右也乎康健之父母行動可以自如取
携可以自便朝作暮息可以任意訪親問舊可以娛
情衰老之父母兒子便是手足不在面前手足欲舉

而不能媳婦便是腹心不在膝下腹心有求而不遂
時而忿忿於內時而戚戚於懷爲人子者善體其情
能頃刻離左右也乎具慶之父母日間有以作伴夜
間有以相溫晝無所事相與說短論長夜不成眠互
爲知寒道冷寡獨之父母兒女雖有團圓之樂夫妻
已成離別之悲家庭之內獨行踽踽涼涼形影之間
惟有悽悽楚楚爲人子者善體其情能頃刻離左右
也乎嗚呼試問身從何來親爲生我之本孝爲何事
人所自有之心見我此章而不動心者非人也見我

此章而不墮淚者非人也逾子忤媳見我此章而不化爲孝子順媳者與禽獸何異人人得而誅之者也

救世文

蓋人得天地正氣以生又必得父祖撫育以成則父祖之大恩同乎天地之恩也奈何世人或有待子孫妻妾竭盡真誠不辭勞倦不惜錢財待父母虛假吝財弟兄牽較無關痛癢獨不思愛子孫無非望其養老殯葬照管墳塋也如爾不顧祖父而子孫豈肯顧爾哉况薄待父祖卽爲忘本喪心未嘗不褻天神是

故不孝者皇天之所震怒也天必使其窮苦天絕決决不饒也婦女忤逆公婆亦然故當待父祖不辭勞倦不惜錢財而盡孝因而推之事君必忠焉天必使才子生其家而後教以勤正學則富貴矣至於高曾祖父墳墓不修失祭天罰慘禍爲尤甚道經云每歲立臘北帝卽北陰統御隨處地方陰兵神鬼細查人家墳墓考察罪釁根由以及子孫之姓名如榔坍出風吹骨殖暴露屍骸卽察其承值子孫之滅天理薄祖先之罪暗使其漸漸貧乏或子孫夭死或孤寡久病

或火盜刑戮絕嗣拋骨如墳修整土淋高厚祭享豐隆卽察其子孫之能循天理厚根本屢陞賞賚暗使福祿徐臻賢婦配合聰明才子顯官榮封仙經垂訓至真至確是故眼前有人平生無惡孽竟或夭或貧或殘疾或死絕愚人不知其緣故皆曰命也前世事也正不知其薄祖先而天神罰之也眼前有人平生無善功竟或富或壽或康寧或顯貴愚人不知其故皆曰命也前世修來也正不知其培根本而天神賞之也七世祖考有一不安則子孫未能發達如水浸

蛇獸穿穴擲坵風入死者不能自爲必望子孫修好如忽畧不修則高曾受苦而子孫困窮死絕矣吁惜哉挑土不過一二工所費甚少而勿挑好則禍及乃大所失萬倍更有死絕之慘當汲汲挑修勿疑勿怠勿牽較有智量者獨任整修則諸福仍歸汝身以後天必將牽較者之家產漸併于不牽較之人矣切勿妒忌房分陰受其禍也有人刻施吾掌錄仕籍卽註之以功名與之以才子焉

勸行社倉文

余一日朝玉皇見天下諸神表奏善惡奉旨送嶽司
審定訖報下某州某縣某人害衆成家以劫盜報某
州某人剋取貧民畧無惻隱以子孫窮乏報一子有
文才合霑文解檢籍除名某里某人富而不仁貪而
不厭傲忽衆流以疫癘病死報其甚者數人以王法
流死報又有申奏放無息錢者活及千人以子孫顯
官報又有散施死者棺殮病者醫藥貧者饋粥其用
心甚廣但有所止所及未洪以子孫登第報余因是
三歎世人用意迷惑所見不廣故風俗日薄災害歲

興善報者百無一二惡報者比比皆是無怪乎賢人
君子不降於世末劫又作矣大抵世人以爲多積錢
穀可以貽後不知罪惡貫盈反爲己累終不覺悟因
是與列仙論及欲挽回太古之風使真才實能之士
復生於世者惟有社倉一事可以拯救貧弱甚簡甚
便畧無一人舉而行之良可憫悼一鄉一里一巷之
人溫足者不下十家以上中下爲率隨豐儉率具義
錢輪次掌之收其本錢勿討其利自鄉行之鎮自鎮
行之縣自縣行之州互有所濟其利甚廣非特劫盜

疫癘等報不見於前行之數年之後真賢實能輩出以建功立業太古氣象不還於世者余不信也有能行之報應如響其有逞辯給語好議論是非沮壞者神亦有以察之付義勇司降傳富足有餘正宜行此

勸敬字紙文

士之隸吾籍者皆自敬重字紙中來如宋朝王沂公之父見字紙遺墮必掇拾以香湯洗曬燒之一夕夢宣聖拊其背曰汝何敬吾字紙之勤也憾汝老矣無可成就他日當令曾參來汝家受生顯大門戶未幾

果生一男遂命名曾壯元及第予竊怪今世之人名爲知書而不能惜書視釋老之文非特萬金之重於六經之字有如鴻毛之輕或以字紙而泥糊或以褶屏或以裹褥或以糊牕踐踏脚底或以拭穢如此之類不啻相倍蓰矣何釋老之重而儒教之輕耶是豈知三教本一而欲強茲分別爾况我自有善惡二司按察施行以警不敬字紙之類如平日苦學雞牕一旦場屋或以失韻誤字例爲有司之黜終不能一掛名虎榜者皆神奪其鑑以示平日不敬字紙之果報

也諸生甘受此報恬然不知覺悟甚至子孫不識字舉家因受其害者遠則不足以爲戒姑以近者言之如瀘州楊百行坐經文而舉家害癩昌郡鮮于坤殘孟子而全家滅亡果報昭昭在人耳目楊全善埋字紙而五世登科李子才拾字紙而一身顯貴既能顧惜字紙陰報無差昨因太上降生之辰玉帝御太極殿修文郎顏公葛真人等三上表而言此事若能以字紙爲重或埋之於土或焚之於火更能告諭相率力行始終不怠卽消災而降之福知而不敬卽奪之

福而降之殃玉旨下專委吾徧行飛鸞申明斯事已曾於成都就西南道院降榜曉諭矣又曾滇中降鸞曉諭印施今又降於南安戒諭普行若見而知之知而戒之顧惜而敬重之此卽諸生功名之梯級而父母責望之門也諸生一誠相感故吾盡言之以救士風之頽庶幾夫子之道重於泰山而六經之文不致爲敝屣此卽吾之願望也世人見此卽將刊刻流傳遞相告戒使人人敬之重之則獲福無量若不知敬則殃流後代可不畏哉詩曰儒門立五典道釋起三

宗一切閒文字皆與藏經同愚癡無見識多拋糞穢
中墮身千萬劫永作厠坑蟲惜字一萬延壽一紀子
貴孫賢縣縣不已

附 惜字律

國家頒行惜字律

風調雨順干戈息

僧道徧傳惜字律

慧眼自明六通出

富貴人傳惜字律

子孫永遠受天祿

孤寡人傳惜字律

人人相親如眷屬

病人徧傳惜字律

永久安康病自除

貧賤人傳惜字律

衣食自然一生足

公門人傳惜字律

逢官近貴皆清吉

一切發心刊印者

善報昭彰慶有餘

敬慢字紙功罪律例

功例一生平以銀錢買字紙至家香湯浴焚者萬功

壽增一紀長享富貴子孫榮顯

一生平徧拾字紙浴焚者五千功壽增一紀得

富貴子孫賢孝

一多收字紙深埋淨地者一千功安樂無流離

子孫昌盛

一刊刻惜字書文徧傳世人者五百功永無是非多生貴子

一抄寫敬重字紙書訓闔門人令其珍惜者三百功子孫發達

一見惜字文留示子孫及已身敬信供禮者百功安樂無禍

一化銀錢買字紙浴焚者百功壽增一紀施財人永遠富貴

一勸世人惜字並焚恠異淫亂等書者百功本身增壽子孫貴盛

一僧道不以有字旛帳作囊雜用能自戒勸人者五十功德名光顯

一見人作踐字紙急以素紙換焚或以他物換焚者五十功百病不生轉禍成福

一禁人不以字紙拭穢者十五功其人昌達

一凡人有難或急或緩見字紙必浴焚者萬字十功卽得平安

一勸人不以字紙及錢放床褥下者十功得安樂

一偶於穢處見字紙卽收下不輕忽者十功一生平安

一禁人馬上有文字及錢不騎者十功得安亨

一不以字書夾鞋搥自戒內眷及勸人者十功子孫智慧不忤逆

一勸人不以書字放濕處霉爛並扯碎踏踐者十功必得名壽

一生平不輕筆亂寫塗抹好書者十功永無凶事

一刮洗器物門壁上字者五功得眼目光明

一讚揚敬字紙文爲大功德者五功獲福必多

一見人以字紙封蓋葷臭器皿換取浴焚者五功無惡事相遇

一以字紙焚香爐中者三功得享吉祥

一遇字紙漂淨水中萬字一功

一代人收採浴焚字紙萬字一功得享清福

罪例一將人錢要買浴焚字紙取用作踐者一百罪
歿折子孫貧賤

一騙人買字紙錢不買字紙焚者百罪惡病歿
折

一已身不敬字紙經書又不訓教子弟遞相輕
侮者百罪惡瘡遍體再生痴聾瘖瘂

一遇字紙焚處踐踏撲滅及收用者八十罪定
生腫毒

一家藏敬字書文或拭穢並霉爛者七十罪多

惡事無救

一僧道以有字旛帳作囊雜用六十罪薄福受
刑

一以字紙包物裹經書墊木魚器用者四十罪
蒙蔽慧心

一以字紙揩拭桌几及揉搓棄地者五十罪遭
流離去智慧

一見勸善書惜字文不信不傳人者三十罪窮
年窘迫生子不孝

一以字紙經書放船艙底並馬上騎坐者二十
罪生毒瘡受人欺

一以字紙漂污水焚穢地者十五罪多目疾昏
盲

一自己不敬重字紙反又譏笑人者十五罪多
遭橫非

一以經書枕頭及以錢與字放床褥下者十五
罪窮苦受杖

一以字紙引火打亮者十罪生疥癬

一見婦女剪字紙做鞋樣及為花墊盤盛盒男
子不禁止者十罪受枷鎖刑

一以字紙嚼吐壁上及扯碎作書撚者十罪爛
唇手生惡瘡

一掩昧敬字功德者十罪不得吉祥

一輕筆亂寫拋撒不顧及旋寫旋塗抹者五罪
減聰明

一以字紙糊窓壁褙屏褙書殼者十罪受冤枉
不明

- 一怒擲字紙於地下者五罪減聰明
- 一女眷以字紙書夾鞋樣男子不禁止者十罪生忤逆子女
- 一婦女繡字於荷包香袋扇插枕頭上不行諭禁反繫帶於腰間並將枕頭枕臥以致褻污者五罪得暈眩拘攣之疾
- 一以字扇書啓等插靴襪者五罪足生毒瘡
- 一以字號寫器物上致人坐踐者四罪家不祥
- 一以不淨手檢閱經書者三罪生疥指瘡

- 一以字磚墊路者五罪行事不順遂
- 一於地上畫字者三罪多遇險阻
- 一刻裁字跡者三罪多驚憂
- 一以字紙楷神像拾塞牆壁內者一罪雖功不

錄

鱸壇勸世文六則

學以立命而盡性為先道以修身而敦倫為要故愛敬開仁義之源孝弟居人倫之首必敦篤以彰備德之躬斯參贊而宏位育之化建天地而質鬼神考三

王而俟聖哲卓哉聖道自古爲昭慨自士行卑賤遂
至吾道危微以心性爲分外之謀假詩書作沽名之
計藐天道而謂虛無迂聖言以供謔笑逐莩莩之利
當財不讓於親圖瑣瑣之名干榮頓喪其守方列泮
水而氣虐小民纔登鄉薦而勢驕同輩出入公門假
勢以恣其所求往來市井竭力以營其所欲明知財
本非義矯曰姑取何妨亦識德必加修尙謂將來有
待將一字以破人身家以一言而刺人幽隱傲忽師
尊輕欺同志見善則曰我力未能逢利則曰惟我所

得罔知名節之重弗顧行已之污辱名敗行不自知
其非喪德損功猶以爲得計傷殘骨肉不思一本之
親輕薄宗親罔顧同枝之誼淫非已以傷風化汚同
輩而壞防維嗚呼士多類此可勝道哉余故假鸞特
申提命爾等當知生成恩重孝弟倫深名節匪輕廉
恥非小不惰屋漏之行常抱衾影之慊非其義一介
不取如其道萬鍾無辭從善若決江河去惡如除臭
穢兢兢乎時體會子之三省凜凜乎力效顏氏之四
勿接物常加忠恕與人亦貴和平不記怨而圖報當

念德以思酬閉戶以修性命策志而究詩書念宗族之寒微憫骨肉之微賤蘊才不露謙謙昭君子之容陰善不矜藹藹成吉人之度不踰禮而苟合不犯義以爲非謹天命之式臨惕聖言之如在各依訓誡免皓首之徒悲常勉遵行獲青年而早第敢有違命自甘下流雖吾莫可如何幸各一爲省惕

天地之道非士不宏帝王之功惟儒克任是以紫綬金褒乃屬橫經考道之輩龍章鳳詔皆歸秉仁守義之流豈取章句之浮文應重經綸之實效夫未能治

人先求正已敦孝弟以肅家修士之責也篤名節以整風尚誰之任與嗟古風之旣邈嘆斯文之日渝視三綱爲故典曰五常作具文明一經則曰已可鳴世受一職竟謂儘足榮身呈忠孝之言不啻披肝瀝膽考愛敬之實何異色取行違微有利雖辱行而不辭稍有名卽喪恥而甘蹈愚者安於狹小規模智者逞其驕矜氣象恃才以凌物挾勢以欺人宜其皓首而不第終老以悲傷也豈天地之有薄待亦自作之孽宜然余承帝命責在淑人凡居儒流悉吾弟子故不

憚數語之丁寧以聊作提撕之雅誨爾等靜居當思神聖之式臨動作務如大賓之在側事親勿圖奉養之虛文當思竭力事君勿蹈脂韋之故習必求致身制行於難制之時存心於難存之地雖造次而不違卽顛沛而勿失人之勝於我者不恥就正之功人之遜於我者當勤教誨之義果能遵予所諭豈徒福爾之身亦必福爾子孫若違吾諭豈止禍爾之身猶將禍爾子孫各宜凜遵毋貽後戚

天命之性人物攸分物假之而秀人得之而靈小而事物云爲大而綱常倫紀上自天子王侯下而士民凡庶普哉至道允矣惟均自修道之教失遂恆性而沉淪或移情於美色傷身忘命或溺意於杯酒徹晝連昏或馳情於市利朝營夕算或妄干於榮祿巧取媚迎微有勢卽爲弄法稍有能動輒驕矜背義禮而違天地甘污辱以慢鬼神過而憚改善而不恆居身不正傷風化之本修德不力壞秉賦之仁豈知學以爲己惟日計在圖名欲齊家而治國必誠正以修身不敗行於屋漏常惕志於衾影入不愧於親長出無

咎於君民將非義之是戒惟德性之是尊凜志於十
手十目持心於不覩不聞雖窮居不移其節卽得志
不變其行爾等依吾所告各立心以正行更加勤苦
以力學天必佑汝於陰靈天道昭昭可怖衆宜謹慎
思循以學端身以恕待人格理以智宅心以仁士庶
大家振勵吾道從此復新

福善禍淫災祥雖由天定逆凶惠吉臧否實自人爲
一念而善惡攸分寸心而天人是判屋漏虧心神明
是鑑勿謂善小而紀功必載其名勿謂罪輕而紀過

盡錄其事一一不爽絲絲必報或在己身而窮年不
第或流後代而落莫凋殘赫哉斯道允足欽威爾等
身被儒服名列士林責任非淺擔負不易當遇物警
心履影惕形範身於法言法行淑躬於地則天經父
式慈而子式孝篤和氣於庭幃兄則友而弟則恭彰
雍睦於家室勵志而堯舜其君感懷而文武其民仁
以展親親之誼義以正取與之分身嫺經史寧日規
矩儀文性淑詩歌非謂聲音鍾鼓當閑性而閑情必
陶品而陶器舉動可見天心云爲足通帝鑑制行潔

清砥奸淫之澆俗行已廉白化貪污之靡風著理道以承先聖之傳述簡編以開來學之統是皆性分之所固有豈非士職之所難辭若夫設義倉以濟困苦修橋梁以渡涉溺行便宜之善事作隨遇之陰功施棺木以拯幽滯廣經義以指愚迷老弱推以衣食逸其勞苦幼稚加之提携普爲教誨雖一事亦足以爲功卽一言而何莫非善在官則陳民之疾苦在私則揚君之聖明見善則助人之不及逢惡則格人之非心愛生須及草木之生惜命必至螻蟻之命危急爲

之奠安窮困爲之拯拔此乃上天之所首重亦卽士行之所當爲旣內有以端其修身之本外有以廣其造命之功加之三年伏案九載螢窓天爵旣備於乃躬人爵卽隆於爾室用是光爾祖宗以之澤及苗裔豈非天下之大儒是卽古今之傑士凡我弟子幸各遵行勿以吾言爲藐藐當體相勸之殷殷

循環者天地自然之運感報者鬼神實司之權故爲善降祥貧賤而膺利達作惡降殃富貴而落困窮命之良也而災非起於一旦數亦厚焉而落寞至於終

身有多男而倏遭天喪積豐資而忽至徹貧夫豈哉
培之不至抑亦傾覆之相因或逾親而傲長或虐弟
而侮兄或薄族而忘本或背室而爲非見財則求取
百計鬻賣不顧他人遇利則巧營千方富樂惟圖一
己夫綱常爲重寧容悖侮人我一體豈可逆施是以
天厭其行轉福而爲禍神憎其事易祥以爲殃或令
顛沛於闔門或令疾患而一世或令窮年而不亨或
令微賤而乏嗣赫哉斯道密矣難逃予因悲憫假鸞
申誠爾等勿崇儉薄當尙樸醇孝於父母孝可基福

和於兄弟和則致祥勤以立業免終歲之無資慎以
居身樂四時之迪吉無取不義之財遇困則施無謀
非分之事見善是守教子以義庶保後嗣之遐昌處
室以和永樂家門之安慶敬以祀神勿淫求而肆殺
信以待衆勿口是而心非此皆爲人之要道抑盡居
世之常經爾等一一佩奉上天自有鑑憐寧獨承先
而啓後亦且延命而保身体甘心於不義犯天罰之
降臨吾今再行申諭士庶謹慎遵行

祖宗積德方得生我靈明衾影無慙斯能不忝賦畀

形軀雖一物之微化育實天地之庇懷胎鞠育殫父母之劬勞刑政教誨賴君師之導誘兄弟一本手足情深夫妻合德唱隨誼重提携賴之同人扶持需乎友誼卓哉大道寧容戕侮偉矣宏綱孰逃大範慨自知能既失薄習日滋子而忤逾父母不念身從何出民而謗議君王不思身賴孰成兄弟鬩牆竟忘胞乳之共夫妻反目罔計倫化之源欺侮朋儕瞞害愚懦甚至損人利己害衆成家見財思得雖分文不讓乎貧窮有害計推卽毫末不念乎親長貪色傷其風化

巧取壞其廉隅視宗族之寒微漠不動念觀他人之顛沛漫不垂憐爭持恃血氣之剛勇傲慢仗家勢之富豪殺生侈費害物肥身崇淫祀而戕生邀妄福而傷命或誦經讀書而心口相乖或談彼論此而閨幃不諱種種愆尤難以筆載所以人既失德天遂降殃大而刀兵水火小而身訟官非重而疾病饑饉輕而傷體折財豈徒然哉良由因也然天罰雖嚴而天心甚恕今宜痛改前非力圖後德修五倫以端身本除百惡以去身垢拯貧濟急惜老矜孤重物憐命以培

仁心窮理盡性以全心德人心既改天運自旋又何
所求不遂而畏橫途之難逃也吾今悼憫飛鸞告布
各宜猛省共回積習

曉世文

帝君曰吾自一十七世爲士大夫以來皆恐懼修省
厥後道應六匡職掌二籍稽查人間善惡爰定下界
科名其於陰陽果報之故生死輪迴之機會鑑之真
而司之允矣凡士子隸吾籍而榮顯者孰不從陰隲
中來哉顧其間有原隸吾籍而轉下第者有未隸吾

籍而旋登科者亦有未隸吾籍不僅登科而使之居
高位享厚秩者更有原隸吾籍不僅下第而使之落

魄終身

魄音莫

坎坷無狀及其死也墮入地獄受諸罪

苦轉入畜道以至永無出期者豈陰隲之無憑歟實
由前身與今身善惡之殊焉蓋嘗論之禍福無門惟
人自召前不善而今善其爲善也可嘉其隸吾籍也
固宜獨怪夫前善而隸吾籍今不善而黜之甚至冥
誅顯戮而人仍怙終不悛樂此不疲者何哉夫亦謂
身固我之身而子孫亦我之身不如此不足以肥其

身而福其子孫也豈知福善禍淫事有必至惠吉逾凶捷如影響書言作善降之百祥作不善降之百殃如是以肥其身而身反受其殃寧無懼乎易言積善之家必有餘慶積不善之家必有餘殃如是以福其子孫而子孫反受其殃可不畏哉且無論其身之果殃也即使不殃而生前倖漏一時之網死後必無再世之期與其死無再世之期以倖漏一時之網何如不倖漏一時之網以保再世之期出劫轉生復隸吾籍之榮之爲愈也抑不必其子孫之果殃也即使不

殃而生享無窮之福我死受無窮之苦與其我死受無窮之苦以致彼生享無窮之福何如聽子孫享自然之福免我死受無窮之苦出劫轉身復隸吾籍之榮之爲愈也况夫我死受無窮之苦又烏知子孫生享無窮之福即使子孫生享無窮之福彼又寧計我死受無窮之苦然則子孫爲子孫之身我自爲我之身也明矣夫子孫旣不能以自有之身代我受苦我又何樂以無良之行福彼之身乎與其以子孫之身爲我身作諸惡而爲彼受罪何如以我之身爲我身

作諸善而爲我受福出劫轉身復隸吾籍之榮之爲
尤愈也嗚呼身非不可肥也子孫非不當福也欲肥
其身以福其子孫正宜積德以俟之行仁以待之而
乃執迷不悟喪厥心昧厥良機械變詐無所不至是
猶飲鴆酒以止飢渴吞信石以冀長生也夫亦安有
不殃迪厥身以及其子孫也哉總之論道理則不言
劫數災祥正人心則必語陰果報應觀燕山之積善
功天錫五桂白起之坑趙卒雷擊牛身宜憬然矣睹
介葛之聽犢鳴三生犧祀齊襄之見豕立倏作人啼

應瞿驚焉乃自暴者聞之而不信自棄者見之而生
疑豈以精氣爲物游魂爲變原始反終之理孔聖爲
人空談玄妙耶噫是亦不知生死之說未通幽冥之
故者也又烏足以讀古人書而妄冀夫隸吾籍也耶
今而後吾與若輩期宜保本始之靈明存固有之天
良遵吾說而行之原隸吾籍者遷而陞之卽未隸吾
籍者亦錄而登之否則天譴人責削籍減算消滅滋
深困窮益甚冥冥中決不能爲爾曹宥也戒之哉毋
作惡爲人害而轉以自害

示行致善籍功過格訓文 訓詞附

吾爲士大夫一十七世吾嘗循規蹈矩吾嘗去僞存
真吾嘗力持善果吾嘗廣積陰功吾嘗謹言慎行以
全五常之德吾嘗正心誠意以立慎獨之防存吾心
養吾性無非淑身以淑世保吾身明吾德無非全受
以全歸不意世人往往自知自賢不知循分盡職爲
要自暴自棄何知爲善去惡爲先雖屢降乩以文規
恒現身以威化每覺信者十之一疑者十之九見者
或有自省而易轍聞者並未自悟以更新卽令大彰

訓導直言規勸口信心疑者尙有許多名從實違者
不知凡幾然局外者訕謗而悖逾固難逃乎默譴局
內者藐視而非議亦加倍以罰規幸矣哉文嘉二子
誠心尤篤勵志凜遵快矣哉衍仁芳聰謨五子欽服
奉行體意盡職更堪羨者果將功過善書聚首同堂
潛心撰輯朝夕之苦勿憚志氣相孚彼此校核爾我
之見不存三書裒成一集稽查甚易一門編列五類
討論無難况條目或刪或補無不當於人心切於天
理詞言或長或短亦皆該乎人情統乎世故其斯善

書果刻成帙施行天下傳諸後世遇留心理學者無不惕志以警心而吾哀憫救濟之懷可以緣是而益廣感化規戒之意或者藉此而彌彰所望盡二三子之心才以開千百人之善路殫數十日之功勞以作千萬年之衣鉢然而善世之念固當殷善身之心亦宜篤爾子錄過記功之誓毋始勤而終怠毋身行而心違毋絲毫有漏毋一眚自欺毋假此以自誇毋借此以沽名毋惰鼓舞之志毋生炎涼之論毋以俗言訕笑迂拙而私懷退志毋以後日聚會不常而自懈

持行毋以運逢屈抑而輒止毋以果報不速而卽已
衍子等果能勵志遵守果能功過無欺果能始終不渝果能彼此同心洞鑑昭昭不爽默賞一一無差凡同志誓行者各當體悟無負此一片婆心也吾故嘉之吾故勉之吾故以此通知

善善惡惡出心中 是是非非在意通

明明白白區功過 年年月月猛用工

默默靜靜自檢點 大大小小莫彌縫

兩兩三三志勿懈 遠遠近近報非空

命高名望等宣示訓世文

吾爲士大夫一十七世孝親忠君未嘗一念偶間敬
天畏地未嘗一念少欺尊長順師未嘗一念少忽欽
神服聖未嘗一念畧輕安淡泊守寧靜惟以修性養
心爲要持剛方矢正直惟以敦倫知恥爲先祇以誠
實居心不以浮夸恣意祇以謙和持已不以才智先
人信友朋忠告切磋善道宜兄弟友恭藹翁怡和舉
才薦賢饒人責已矜孤恤寡撫幼憐貧不銜已長不
攻人短不挾權貴以凌世不衣已有以自私不諂不

驕榮辱無計無毀無譽喜怒不形廣積陰功未嘗一
念望報力行善果未嘗一事沽名適洽上帝疊賜旌
封權司黜陟足當下士咸宗法則職掌文衡惟是記
過錄功纖粟不漏賞善罰惡絲毫不遺然吾濟人之
心惓惓不已憫世之念殷殷未忘是故惕天下之狐
疑恒現身教化天下之錮陋數顯神通無如士庶不
齊善惡迥異往往不知孝弟忠信不知禮義廉恥好
名而不務實貪利而不守義止知越禮諂瀆以媚神
聖何知循分忠孝以奉君親狎侮老成輕慢前輩孰

知長厚之足式忽逾師長倨傲良友誰識道範之可
欽毀謗聖賢污穢文字闖牆興變同室操戈倚勢欺
凌里族恣慾姦淫婦女室內只聽河東獅吼家中一
任牝雞司晨捏造淫詞妄肆譏訕誘人爲惡沮人行
功狠戾妒憎呪詛視爲常套誣嚇毀譽喜怒習成家
風藉官長以爲利階夤緣賄賂借幫訟而索酒食唆
掇爭端假公濟私瞞人昧已內逾外順心毒貌慈苟
富驕苛以取財怨貧諂騙而負債逞奸刁而笑拙恃
智巧以欺愚怨天尤人呵風罵雨種種罪過愍不畏

悛行行愆尤冒干天律甚矣不知天條之可畏嗟乎
藉口陰德之無憑輒指某也信善而多殃寧知祖孽
未盡妄扳某也造惡而反壽豈知宗德流餘猶且曰
死後地獄加刑誰人得見殊不謂生前天曹降禍那
個能逃上天報施昭昭不爽諸神糾察赫赫無差因
而病痛瘡痍困天傾滅計輕重而罰身受亦且癩癡
瞎啞殘喘疲癯較淺深以殃子孫况雷劈虎傷火焚
水溺皆因作孽所致矧刀兵刑獄瘟劫盜戕何非造
惡所招所以太上篇首日禍福無門惟人自召善惡

之報如影隨形此豈虛言耶人何迷而不自惕也乎
吾甚哀之吾甚憫之故不忍士農工商之顛危曾顯
聖以威化幾詣林馮王彭之齋舍屢降乩以文規深
惜乎見者悟而聞者疑藐彼諄諄而漠聽切望矣智
者豁而迷者醒體此殷殷而革新噫嘻是篇也前非
我之自誇第以吾身示標準後非我之嚇世惟以果
報指迷津深冀世人如我存心獲福無量又何富貴
嗣壽而不獲願者哉凡民猛惕士子尤甚毋負我一
片婆心也吾言止矣其可忽乎毋以吾言爲平平也

毋以吾言爲無奇也毋以吾言視爲常談也毋以吾
言視爲弁髦也高名望劉五班頗能敬信此道高揚
任劉陞文亦能覺悟此理今塑吾像吾其依之敬吾
身吾其鑑之故憑有感之精衷曲示無聲之警戒四
子其力勉之四子其與人共勉之四子其毋憚廣勸
咸使聞知

戒士子文五則

聰明正直而依仁神之所貴寬厚忠信而好義士之
所先故憑有感之精忠曲示無聲之教化咨爾有衆

聽予格言蓋聞富貴在天得失有命知之者安於自
 然而無庸控告昧之者貪於必得而每有所求或謂
 精神交而夢寐通或謂祭祀豐而神祇格宮殿樓觀
 務碧瓦之翬飛階闕廟廊誇朱欄之雕翠從茲末務
 失其本真不知進退存亡係彼三班天地水三元也四屬春夏
 秋冬四卿也行藏用舍考茲五部文武火雷六臺南北六
 皆上天之神司人六命者也既有司存豈容計取然不可一拘於
 前定又不可迷昧於進修故修身勵行者天必降之
 百祥而反道敗德者神亦奪其五福理所著者人弗

知之是故運數宜符而反受其殃災星顯照而或蒙
 其吉造化以之倚伏神明由是乘除凡厥儒流恭行
 教法爾等毋欺天遠毋謂神幽毋言暗室可欺毋道
 明庭不畏毋凌孤寡毋侮老成毋取不義之財毋淫
 非已之色毋厚結他人而親戚歧路毋泛交異姓而
 兄弟鬩牆毋恃已長毋攻人短毋好逸樂毋縱遊畋
 毋負才名毋挾官貴毋厚仙釋而薄於父母毋敬鬼
 神而慢於師資苟有負於吾言斷不逃於天憲故生
 平俊彥者累困於場屋一旦精明者遽登於鄉書皆

有因緣固非造次世之腹誹心謗者往往得以藉口人之面譽背毀者悠悠姑以欺心彼司文衡而豈得以私此權祿籍而故先有取濟濟多士天其或者臨之巍巍成功吾則是之取爾宣告中外咸使聞知今歲取士不止一端要在得人以副衆望首以陰功孝行爲重次以處已謙和爲賢力學者則酬其勞高才者則遂其志傲忽者未免黜落輕薄者姑示勸懲文章假之以定其去留神明司之以公其予奪人不自省明示訓言嘗謂惟士無能苦學爲能居貧不富

成名卽富士無分於貴賤人切在於勤勞凡大比先較德業之短長故有司始定文章之優劣不可謂前定而不肯奮勵豈可以宿緣而自必操修名雖曰士初無士行之寸長身雖曰儒徒爲儒服之觀美不敬天地不信神明狎侮老成輕慢前輩違逾父母而逸樂度日傲忽師長而放蕩無時試不遂則罪有司之不公榜初張則謂庸流之濫得責人者不能責已議人者所以議天或恃已之見而過人之能或銜已之長而攻人之短或矜所學而忽畧一世或恃所解而

輕視衆人立身不正則以曖昧貪饕爲能用心不臧則以機巧變詐爲勝較短論長而不從公道奪彼予此而不恤人言面譽背毀而求苟合於人口是心非而絕不容於物外貌雖慈祥徒巧言而美語中情多忿憾好潛賊而陰謀不擇乎友而交不義之朋不和其室而淫非已之色舍已田而耘人田失去多矣作無益而害有益損孰甚焉預鄉薦者自謂志得意滿不復進修入省闈者則曰功遂名成直可唾取恃才傲物挾長欺孤常交貴結援而誇耀等流以隻字片

文而蔑侮同輩在市井則和合貿易以覲其所得遇州縣則鬪合爭訟以滿其所求不忠不孝甘心冒法而妄爲非禮非仁直情徑行而弗顧遊畋無度博奕廢時耽飲食而自喪其神逞威勢而乃敗於德致屢困於場屋安敢望於榮華况三年初無伏案之功而一旦遂萌登科之望稍無成直歸於命運纔有力專務於禱祈不知天憲之難逃深恐人心之愈惑出處語默之際天必察之進退予奪之間神所司者豈容倖取不可計求苟有行業之可書奚患飛騰之不遂

邇者營業相傳之後屢有聲名儒冠世守之家反被
黜落不知營業之子安分讀書無形顏色每見儒冠
之後自恃名族多有驕矜神明有赫專激勵於輕薄
之流天道無私用獎予於淳樸之士若能自悟晦迹
韜光望欲有成勞心苦志曲盡陰功之事務存忠孝
之心反乎上古淳樸之風無流末劫偷薄之俗自然
詩禮傳家科名復舊謙和處已氣象如初天不負人
人宜自勉凡爲士者各宜戒之

士爲民首名教當尊歲月過隙豈肯暫停偷安怠惰
虛負一生反身自問何惡何因損人利己自有冥冥
莫道無報麻豆之根隨其肥瘠生出分明守貧樂道
士者常情簞瓢何陋決踵不驚空空自如歌以鳴琴
何必被繡等作廟牲守拙自巧弄假失真倒河瀉峽
簧鼓空唇如此作孽禍豈無門只須守分切莫驕矜
才高見屈豈是無因或怨貧乏或歎後承或悲晚運
或薄功勲報以心應必有淺深或前富貴或後零丁
隨善惡以分別豈顛倒之無憑爾等成敗俱有數程
韓信未央五十買臣王楊盧駱擯死相尋各當努力

靜夜雞鳴改絃易轍佩服金銘遠去非禮戒爾悖淫
反躬自省無愧於心諦聽諦聽勿負諄諄爲民者勤
儉致富爲士者自得科名莫謂神鬼不見不聞

蓋聞三教並列於古今而儒爲首重四民咸居乎覆
載乃士屬先尊故在天則星斗煥有象之文章在地
則川嶽鍾無窮之靈秀守先待後之任必賴橫經考
道之儒吾謬承玉旨責在作人開化四大部洲徧閱
三千世界中華固禮義之邦江左尤人文之地每藉
飛鸞曲申提命奈人心不古士習日流尋章摘句徒

知紫綬金章幼學壯行空立鴛班鷺序咿唔之業猶
且一日暴十日寒萌孽之生不勝斧斤伐牛羊牧若
時逢大比便欲高登抑知文章未入鏡於有司而德
行先難逃於神鑑或因一字而誤三場皆由輕書慢
典或以佳篇而成落卷盡爲舍義忘仁甚至窮年皓
首不能身入宮墻黑髮青春早已名登鬼錄天鑑不
爽果報昭然如此頑愚吾深憫憾今金陵南境建我
行宮敞閣之傍爲爐惜字維月之朔衆已雲騰越朔
之三又復星聚焚香而祈吾之降出榜而索我之文

不禁煩言所當側耳大約五倫之外罔有聖賢六經之中皆爲明訓存心則堯兢舜業涉世則顏四曾三已有愧於天天始不我佑不可以困窮而怨天已有負於人人始不我親不可以欺侮而尤人吾言不謬各自書紳倘身謁吾而心不存吾焉用此四拜八拜以財惜字而意不敬字烏取爾三分五分羣當銘心佩服吾因傾覆栽培是諭

吾爲士大夫一十七世旣未嘗不讀聖賢之經書卽未嘗不體聖賢之實行所行者非必超世容衆異人見聞不過事君求其忠事親求其孝事長求其順事師求其誠交友求其信治民求其仁處已求其恭治事求其敬處富求無驕處貧求無諂見惡求其改見善求其遷蓋經術萬卷垂世無非忠孝等條聖王垂訓教人多是忠孝事雖天地外忠孝無以遂其生成日月外忠孝無以遂其照臨鬼神外忠孝無以顯其靈聰聖人外忠孝無以垂其經書是天地本忠孝以覆載日月本忠孝以光明鬼神本忠孝以無私聖人本忠孝以立極人於忠孝不盡雖讀書何矜人於忠

孝能全則讀書多益予觀儒生日講聖賢書而不知書中所講何事口稱讀書好而不知書中所好何歸沾沾誦記詞章攷之古人所甚鄙孳孳邀求名利反之吾心有何裨曾中博記經史或以為天地所特生筆下工創詩文或以為古今所罕覲言固孔孟之言行實盜跖之行服固儒者之服心實鄙夫之心稍不幸於已遂責有司之不明稍見倖於人遂謂庸愚之濫得此為士者之大痛也可不戒哉又論

勵士文

予所望者讀書人也蓋讀書人知其禮義等事所以得立朝廷者讀書人也得證仙果者讀書人也生而惡鬼遠避死而地獄永離若一朝惑於利欲為所不當為反居他人之下欲所不當欲恒等鄙夫之流始焉神欽鬼伏終焉神惡鬼侵儒生欲登科甲者富貴固在天也全賴人以挽回造化死生固有命也尚賴人以轉移氣數雖孔孟不貴顏冉不壽而萬世不朽此即不貴之貴不壽之壽也雖桀紂有貴盜跖有壽而千古貶斥此即貴如不貴壽如不壽也已往既然而

未來可知惟修身而俟命何得諉之於命盡人以聽天何得諉之於天所以薄福寒士能挽轉天命而終享榮華厚福名儒徒生安樂而卒至貧賤善者流芳於百世惡者貽臭於千秋大抵然也胡不勉而爲之哉

諭師文序

予自玉帝賜以如意委行飛鸞開化人間訓士尤切惟於爲師之道尙未發明而近世爲師者類多苟簡不知師以道成人之身與人之子孫天亦必以福報

爾之身與爾之子孫昔宋登日講孝弟之事以訓蒙子孫同登進士彭定求親寫感應諸篇以訓士祖孫俱中壯元我夫子闡明子臣弟友之經使天下萬世知爲人之道而功邁百王萬世食其報德俾兩大天子不敢臣蓋師之所係誠大矣予當作文而諭之

諭師文

天命之謂性率性之謂道修道之謂教此理之至常而不易者也吾今以人心風俗爲憂特爲爲師者詳言之人稟氣於天天卽賦以仁義禮智之理故天命

之謂性人以性馭情情自篤於君臣父子之倫故率性之謂道闡明子臣弟友之道使各盡其仁義禮智之心故修道之謂教道修於古規矩準繩定其趨道明於今詩書典冊詳其理道豈艱深而難知道豈迂濶而難行哉無如冥頑者昧於性從欲者涸其性強忍者逾其性而道幾不明而道幾不行是皆爲師者未嘗明斯道以教之於是天性亡而人心漓矣人心漓而風俗薄矣使爲師者果明斯道以教之則天性存而人心醇矣人心醇而風俗厚矣且夫道本師所

素明非必神聖如孔氏仁義如孟子而後能以此教也性本人所固有非必德行如顏閔文學如游夏而後能體吾教也記有之曰學無當於五官五官弗得不治師無當於五服五服弗得不親爲人師者惟於心性之間倫紀之內逐處指點反覆詳明而道豈外是哉蓋因心作則能率性以盡至道之精微聖賢所以垂教於後世也而明善復初必講道以完至性之本量庸衆所以待教於先知也然則人或爲氣拘物蔽不賴爲師者明斯道以復其性哉卽不爲氣拘物

蔽而閑以禮義之正充其赤子之心不尤賴爲師者
明師道以全其性哉而無如爲師者之多苟簡也自
忘乃祖不思孔氏之心傳惟利多金竟失誨人之本
旨遇以功名爲念者而師遂以能詩能文爲有功遇
以識字爲期者而師遂以能記能寫謝乃責舍本逐
末欺世悞民匪獨賊夫人之子也其自賊也亦甚當
人之師事我也子弟之成敗父兄深倚之他人之善
惡我身獨任之使不明道於今日難免貽禍於將來
不教以如何爲忠必致欺上虐下流爲奸臣不教以

如何爲孝必致背本忘親流爲逆子不教以如何友
必致兄欺弟弟凌兄小而鬪牆大而爭訟不教以如
何別夫婦必致順妻妾廢孝弟惟泥情於宴安弗率
之以禮義不教以如何睦宗族信朋友必致殘忍成
性巧詐成風緩急不相恤患難不相救富則欺貧貴
則欺賤窮則詭詐百出以相害於是天性亡而人心
漓矣人心漓而風俗薄矣天賦人以性而師卒不明
道以存其性也天必罪之矣若夫爲師者知人之性
不異已之性因已之明道而欲人之共明夫道也當

念字而敬名冠者有成人之責蒙以養正童子有作
聖之功端根本於爾日沛教澤於無窮於此教以如
何爲忠使知君有成我之恩臣當隨分以報國教以
如何爲孝使知親爲生身之本子當竭力以事親教
以如何爲友使知兄弟爲同體之人兄當體親心以
友弟弟當念天顯以敬兄教以如何別夫婦使知妻
爲內助之人夫當講孝行以訓婦婦自守內則以敬
夫教以如何睦宗族信朋友使知宗族爲一本之親
朋友有相助之義自當移敬推愛長善救失有無相

周濟顛沛相扶持其在長者聞之則入世未深知天
真之難昧其在幼者聞之則先入爲主至耄耄而弗
忘如是天性存而人心醇矣人心醇而風俗厚矣天
賦人以性而師卒明道以存其性也天必佑之矣獨
是道不易明而教亦多術矣如所云忠孝友義諸事
必於四書六經之文切實指引之使終身有所持循
更以孝經及陰騭文覺世真經詳解之俾此心有所
畏慕遇以功名爲念者固當教以忠孝友義使爲士
爲官可恃以維持風化遇以識字爲期者尤當教以

孝弟仁義使爲農爲商不致有乖於倫常根本無虧
求富則玉樓載籍綱常無忝求貴則金榜題名舉凡
世之修善者皆當教以敦倫爲先務且夫君臣父子
之倫子臣弟友之道要必本誠心以行之則敦倫原
於至性而人心自醇苟不本誠心以行之則盡職亦
屬虛文而人心愈薄是在爲師者當啓發其天良毋
徒示以文貌他若淫賭二事足以損德足以喪身足
以亡家皆爲師者當預申其懲戒而尤不可不善以
教之者則在於人倫雖智愚不等賢否不同而言之

淺深視乎人理之精粗盡其說毋始勤而終惰毋輕
賤而畧貧苟能恪遵師訓盡體諸躬行夫孰不爲仁
人善士卽不盡遵師訓而心有畏懼必不至爲奸詐
兇人迨至朝廷多良臣家庭多孝子庠序多賢士鄉
黨多善人懿德皆好觀感日深羣由於達道之中各
全其性命之理人心不已醇風俗不已厚與吾今降
示斯篇凡爲師者皆當潛心持誦敬守吾言爾等果
能教人以道以存人性以維人心以厚風俗吾掌錄
仕籍當註爾以科名與爾以才子焉夫豈可仍蹈前

弊至獲罪於天而不悔哉

末論云是篇正本清源大有益於人心風俗爾輩以斯文傳十人當百善傳百人當千善刊刻不朽廣布無窮當無量善凡有所請如願而獲復續偈云

今生榮貴是何因

皆由前世種善根

斯時再布來生果

復隸吾書定顯身

養性文

文帝見士子教化不轉奏請玉帝速加報應帝心不忍命作此文以警世

儒生讀書求名半在陰功而陰功之積惟在涵養其性情蓋人性多躁躁則生亂貴養之以異人性多驕

驕則生妄貴養之以謙異而能謙則心氣和平矣心氣和平本此以事親孝可格親親必順本此以事君忠可格君君必任本此以交友義可孚友友必信本此以持身身遠暴慢身必端本此以待人人迎善氣人必親本此而讀書書能游泳書理透本此以作文文氣舒暢文必佳是萬善之全不外涵養之功人當刻勵憤勉毋令性情之稍肆焉則可也無如執迷之輩不遵吾訓內承父教到館鮮有時勤外受師傅退後未見溫習心高氣傲朋友總無切磋談闡道闡彼

此多是糊言德澤陰功關之全然不信聖經寶訓見
之視若常談文藝稍通滿假如同飽學應試畧利輕
浮似中三元若此者類皆由涵養之未到性情之未
純故爾有此浮躁不平之氣流露於言行動靜之間
也吾今爲人道破可急迴頭慎勿畏難苟安以暴棄
慎勿自欺蒙混於父母慎勿驕傲滿假以招損慎勿
背經輕謗夫聖賢慎勿分心貪戀於酒色慎勿畏師
之嚴毀師之不善教慎勿恃文之佳不思益求其佳
讀吾文凜吾戒和其性平其情無違親無輕師無慢
諸生之自勉

養性法

友無愧心卽是大陰功卽是大學問不假財力積陰
功而陰功自廣不必有心求功名而功名自成是在
諸生之自勉

諸生有志養性吾示以法晨起盥洗虔心默思天地
君親師一遍轉念人生要得中和默思養性文一遍
每日三省言則思其婉和行則思其從容動則思其
謙讓靜則思其溫恭處已則思其卑牧接人則思其
遜順時或不幸而遇忿怒不平之事心中必要思其

涵忍不使暴戾之氣形於聲色無論爲官爲士在家
在外其設心亦必如是而不敢躁卽或事有難容亦
必容人之所不能容斯無害於所養而得其養之之
道也士果如此涵養始則勉強久之自然不思而得
不勉而中將太和之氣流溢於身心而溫文爾雅卽
是聖賢氣象也人得聖賢氣象卽可希聖希賢也夫
希聖希賢之學卽是修真悟道之功盡心養性到得
純粹不特可以得名得祿亦卽可以成仙成佛也養
性之功如此之妙士何憚而不養哉

勉學文

蓋聞人之生也原天地秀靈之理而成性秉父母中
和之氣而成形少則一二三載知識無靈長則五六
七週聰明漸闢父母相顧而言曰吾子青年小子命
爲漢世之從遊而勿效周朝之芻牧送至儒門近則
遊之村里遠則至於天涯蓋子樂生徒之骨肉而親
悲無子之鴛鴦自宜惜古人之寸陰以克振家聲而
光世族夫何習成便佞一年十二月月好遊好晏
每月三十天天天樂韶樂驕共座上而不思江南之

客隨春風而唱鷓鴣語字畫聊草成形頓異羲之之
字法論功課瞞心昧穎幾忘太白之文章迨至業不
能修德不能進僅同沉淵之湮沒則日往月來流於
耄老白顏而茫無堪信其終也已况吾也值茲文衡
拔選操持玉簿閱歷人寰難挽士習於江中聊爲勉
學之俚語嗚乎悲矣

勸忠孝文

人在世莫大於忠君孝親蓋君上任一人以作吏卽
望一人盡心以報國故自宰輔以至州縣吏員莫不

有祿位俸食之典以榮其身則君上之愛爾可謂至
矣况爾旣出身爲官則下土斯民咸以父母望之是
民之望爾可謂殷矣然則爲官者顧可不忠乎哉設
使不忠不惟上欺其君而且下虐其民豈謂天網恢
恢而容此不忠之臣乎所以貪官污吏後代每多寥
落皆不忠之報也無如謀利之徒絕滅忠良見有可
生之處則棄君上之仇不報乃委身仇敵以圖已利
毫無愧恨之心或當太平無事則尸位慕祿設出種
種方法嚼民脂膏曾不思君之任我以官者何爲而

乃朝夕計較自己囊橐不肥豈事君致身敬事後食之說尙未聞之耶故與其欺君嚙民以圖利何如盡心愛國以留名與其避害逃生以求目下之富貴何如殺身斷舌以享後代之血管所以范文正公以天下之樂爲已樂以天下之憂爲已憂能忠君於無事時焉張睢陽被仇所擒斷其齒而不屈能忠君於有事時焉舉一二人可知古來留名簡策莫非忠君之臣也爲臣者曷不效諸若夫孝道更難言矣蓋君臣以義合而父子以性成不孝則傷天性以故聖王治

天下必以孝道爲先孝道遵則五倫盡焉試觀古來孝子未有不愛兄弟者也愛兄弟則父母樂其子之相好而無鬩牆之憂此以愛兄弟而孝父母也又未有不忠於君者也忠於君則父母樂其子之成名而無覆餗之慮此忠於君而孝父母也且未有不和夫婦信朋友者和則宜家宜室父母樂其無內詬信則相友相助父母樂其無外欺此以和夫婦信朋友而孝父母也孝之道多端矣乃今之爲人子者不思父母之恩昊天罔極當孩提之時夜則移濕就乾日

則未飽啼飢子有病則求神拜佛子有憂則提携問
候及其長也請師受業又恐不能成名定婚娶妻又
恐不能成戶其子在家則一舉一動一心照顧扶持
其子在外則倚門倚閭一心愁思想望父母而可不
孝乎哉吾見今之人父母有一言不和平則氣性悖
生有一事不如意則言語觸犯有一物分得不均就
說父母不公平或聽妻言或聽旁人唆語或持自己
驕性忘却本來面目喪盡良心天理何存而尚得爲
人子乎嗟乎羊猶跪乳烏尚反哺可以人而不如禽

獸乎今吾降下斯文告爾爲人臣爲人子者各宜警
醒爲臣者上盡心於君下布德於民無貪生無貪利
或常或變總以直道自持不失一點忠良則可以爲
君之忠臣者卽可以爲親之孝子矣爲孝子者存心
養親無厚於妻子而反薄於親毋糊行亂爲貽惡名
於親毋執氣性而抵觸於親毋好勇鬪狠貽禍患於
親毋喪身敗體貽疾憂於親每日省親之安否隨時
問親之思求凡有己力能爲者竭誠而奉之遇事總
要柔聲下氣使父母歡悅此人子日用之小孝也不

可不盡若處變者論父母於道讀書者揚名以顯親則可以爲父母之孝子者卽可以爲君之忠臣矣爾等人民各勉力於忠孝兩條毋違所訓予甚喜之予日望之

戒意惡文

大學一篇重在修身而修身之道莫貴乎誠意蓋意誠而后心正心正而后身修故欲修身不可不先誠意然而今之人日夜營思其憧憧於中者盡是私念而大學誠意之道曾不講究吾見靜處閒居之時手

足雖未嘗動言語雖未嘗形而神游目想方寸之中了不勝意惡其或爲淫念歟則心計之曰某人之妻某人之女紅顏堪娛安得吾妻而若此也是身未嘗淫而意已淫之矣何啻身淫之哉其或爲貪念歟則心計之曰今日幾多明日幾少金銀可樂安使吾計而得之也是身未嘗貪而意已貪之矣何啻身貪之哉其或爲妄念歟讀書者尙未得貴則心計之曰吾若做到某官冠蓋至榮人誰不畏我也及一做到遂生驕意是由始焉欲人畏我之心爲之也居家者尙

未得富則心計之曰吾若發得多財聲勢至大人孰
不諂我也及一做到遂起傲意是始焉欲人諂我之
心爲之也彼兩人者妄念一動後卽依此而行是意
妄而身亦妄矣奚異身爲之哉更有妒忌人之意者
見人有一好事則意下憾其已之不如乃私心自計
何以使人此事一敗則可以自快若使人之事果敗
焉鮮不手舞足蹈自稱快意是妒忌之意存于中則
一身無處不見其妒忌矣且有褊狹之意而不能容
物其或一言不如意一事逆乎心則意中反復再思

此人欺我太甚怒然不服忿然不安充其意必欲爭
鬪方可雪恨是褊狹之意存于中則一身無處不見
其褊狹矣意中之惡書不盡言但有意惡者決不能
修其身者也吾今約舉數條誥誡爾民去其意惡以
重修身一曰毋存淫念閨闈婦女全不計及保守一
點元氣淡然無欲而後此意常靜二曰毋存貪念他
人錢財全不妄思長存一點良心泊然寡營而後此
意常清三曰毋存妄念富貴貧賤皆由天定不必私
心計較預作想像而後此意常定四曰毋存妒忌念

他人好事如己之事不必惡人之勝已則渾然物我無間而後此意常厚五曰毋存褊狹念凡事欺人是禍饒人是福人即欺我而含容以受之犯而不校而後此意常平夫意既靜則身亦靜意既清則身亦清意既定則身亦定意既厚而安則身亦厚而安身之修鮮不從意誠而來也有志修身者其於意而重責焉庶大學之道猶不失於人間矣戒之勉之

戒口過文

惟口出好惟口啓羞口之中無憑也積德於是喪德亦於是如人不畏天命瞞心昧已犯法亂爲而吾多說因果力止其非是一言而明道卽一言而積德矣若夫妄肆譏談糊言亂道是一言而快意卽一言而喪德也吾不解世之人往往舌鋒口劍自爲才高得意每遇人機密情事故以冷語警之使人意駭心馳遇人不好事務故以反言形之使人聲消氣短隨人諷笑遇物謗訕莫不巧言如簧幾多曲折曾不計及舌刀斬人甚於斧鉞而橫言曲語喪盡心田毫不予人以容身之地卽有稍知自警者一出卽悔而一到

風流場中笑語頻仍惟恐機鋒不利何曾讓人嗟嗟
郁從周造口過者也而身除宰相蔡虛齋戒口過者
也而子中壯元口過一則顧可犯乎哉人同此心心
同此理爾知笑人曷卽人之笑爾者而自思其果能
容之乎而可不爲他人計乎吾今告爾下民毋談人
閨闈人之妻女卽已之妻女也毋破人方術人之美
惡不關已事也毋散人婚姻人之嫁娶實由天定也
毋論人惡事人之短處恐人知也何必爲之播揚毋
議人陰私人之機密恐人覺也何必爲之洩漏毋唆

人爭鬪人之是非宜爲解散不可以言語不公而使
人釁隙也毋過責人之非人卽有逾乎已不可枉口
呪詛又不可怒罵太過而使人無可含容也凡有口
中雌黃舌下機械不順人情不合天理最宜謹戒毋
干陰罰詩曰無易由言又曰慎爾出話先代之典型
至今未墜吾爲爾等下民共三復之

救劫文

吾乃文昌號曰梓潼職掌三界位鎮九天開化人間
上主三十三天仙籍中管人間壽夭禍福死生貴賤

下主一十八重地獄輪迴飛鸞人間檢察天下鈔錄
衆生不忠不孝不友不恭橫暴苛刻奸盜詐僞等輩
具籍錄中善惡二簿日夜具呈但見善者百無一惡
者十有九孽積泰山罪深滄海玉皇尊帝檢校圖錄
乃惡人滿貫理該收取是以魔鬼巡世疫癘流行兵
戈競起火焚水溺幸佛發慈悲之念開方便之門攀
迎尊帝消除劫難免絕人類如是昊天准消玉旨一
下仍委於我我故臨凡降世點破痴迷教化人心願
諸世人不忠不孝者當全忠孝以盡臣子之道不友

不恭者當爲友恭以盡兄弟之道甚至橫暴苛刻奸
盜詐僞者當復其良心以盡爲人之道倘仍因舊習
世道日趨於僞上帝日益其嗔復劫之厄欲免之不
可得而免也爾諸世人尙其敬而信之勉而行之太
上感應篇云夫心起於善善雖未爲而吉神已隨之
或心起於惡惡雖未爲而凶神已隨之其有曾行惡
事後自改悔諸惡莫作衆善奉行久久必獲吉慶所
謂轉禍爲福也釋氏水懺云過則勿憚改至哉孔聖
之名言定孽不可逃甚矣世尊之大教人非堯舜孰

能無過過而能改善莫大焉過而不改是謂過也豈能逃劫乎佛老云如來度衆生實無度衆生天尊言我今救此劫實無救此劫又曰三台司過三尸神森嚴密布向人身知君機巧能遮飾暗室難逃神鬼噴復續偈云

吾乃梓潼君愍念劫可憐化身千百億飛鸞指迷情四端爲教化秩秩先正心累降筆訓誨世人不自省適逢復劫難滅沒目前存能誦感應篇並念救劫文不特罪愆消福祿駢來臻子孫顯榮昌富貴永無垠

隱藏不傳者天戮誅其身莫作泛濫觀謹慎勉而行

指示善惡關頭文

吾神自開化以來掌先天之桂籍作下民之科梯有一善吾則錄之黍累不差有一惡吾則記之毫髮無遺何世之爲善者少而爲惡者多耶吾今特降淺語指示善惡關頭勿以善小而爲勿以惡小而爲之勿以善大而難爲勿以惡大而易爲之其爲善也譬如燈之有油愈添則愈然其爲惡也譬如火之有水愈潑則愈息燈有油而無不然火有水而無不息也

吾願爲善者剔起殘燈如太陽之照臨光明而不可掩爲惡者保養真火若純陽之修煉羣陰而不能勝此卽暗室之長燈先天之爐火也人豈不爲燈之燃而爲火之息哉彼不爲善而爲惡者以燈火爲鑑也可

訓法天道文

且天之生人也有生之之心必有待之之意其待民也猶君之於民也父之於子也師之於弟也曷言乎君也君爲撫民之人天有撫民之心天之降雨露

亦猶君之有恩澤於民也天之鼓雷霆亦猶君之有刑威於民也此待民猶君於民也曷言乎猶父也父爲愛子之人天有愛民之心天之生萬物使民有所養亦猶父之烹百食使子有含哺也天之定晝夜使民有作息亦猶父之於出入使子有顧復也此待民猶父於子也又曷言乎猶師也師爲教弟之人天有教民之心天之有諸神垂訓詞以化民亦猶師之遵聖道本言語以傳弟也天之有太和以涵濡夫民亦猶師之有禮樂以薰陶夫弟也此待民猶師於弟也

何人心變亂不知有君也不知有父也並不知有師也君爲昊天子不尊君也卽不尊天也父象於乾道不敬父也卽不敬天也師爲聖人徒不重師也卽不重天也天雖有慈愛之心天又烏得而不存殺伐之心夫天之有殺伐也天生之而又殺之天亦未必不仁是天之有殺伐也寓慈愛於殺伐之中能使惡者化而爲善也噫異矣人心絕天良無異於禽獸矣自嘉慶丙子年以來天降三災屢屢只願人心變化誰知人心愈壞吾神雖職居開化亦末可如何願爾等

勸化世人轉惡爲善能尊君也能敬父也能重師也卽是體天之心以爲心天又烏得而存殺伐之心又何勞諸神飛鸞開化哉倘人心不變人雖獨貴喪有因死無日矣勿謂上天之不仁也諸神之不勸也

治家宜勤儉文

帝君曰予欽奉玉旨飛鸞凡塵遊巡東越秦嶽南至海濱西過華嶽北盡巍恒遍觀四國風土盡知五方人情多有怠荒日熾不知身宜精勤奢侈日起不計家中升斗或當耕耘收穫好佚遊以廢光陰或處冠

婚喪祭務文名以失本真則倉廩由此空乏貨財由此虛貧值豐年則家人可保逢凶歲則衣食鮮能何不及早悔悟猶冀殘燭之再明速當挽轉尙期旣衰之復興故吾必降筆曉諭方吐一片之漙心爾必將言抄送庶挽天下之風情蓋勤爲生財之大道儉爲節財之常經雖聖人尙無逸怠凡民尤宜奉行道國尙務節用治家最當凜遵人惟勤儉雖貧而富而富者更盈人不勤儉雖富而貧而貧者益深試觀貧族漸至富盈者皆由於節制精勤富族漸至貧乏者皆

由於奢侈荒淫居家者誠能奉行此語勿怨天不佑我命不及人務須量其出入苦其耕耘自然倉廩日積貨財日增特諭

敬五穀文

帝君曰吾自飛鸞開化以來無日不念切斯民使之豐衣足食歌咏太平無如斯民不自愛惜五穀當年時豐熟粒米狼戾其于一簞之食不以爲奇或棄之溝除而視之不爲驚防或棄之平地而不爲恐懼或多爲犬馬猪鷄鵝鴨之養半食半棄而以爲常及一

且天時旱甚求一簞而不可得到此時妻子啼泣若無所計靠嗚呼何前若此而後若彼耶吾於七月十三日降鸞於魚頭學官承弟子劉大儲等懇懇至叩求吾作一文以勸戒世上富貴貧賤諸人等吾不得不苦口以示人焉竊思民爲天地所生食爲養民之本天地所以生五穀者原以養人也故上古之世木食血飲黎民阻飢雖有伏羲黃帝列列大聖人治天下而終不免艱食之憂迨堯舜氏作舉后稷爲農田之官教民稼穡而後天下之民乃得五穀之養夏后

殷周繼之秦漢之後以至于今莫不下力田之詔告爾下民以謀食之道由是觀之亦不過一毫末之物乃上勞天氣之布敷下勞地脉之生成中勞歷代帝王之作爲民不得則不能生神不得則無所享物不得亦無所養則是五穀也顧不重乎哉吾見世之處富貴者每日盤飧餘飯甚多則不敬重而亂散之更有愛小兒者每殮任其自用遺落於地而不知救養猶過豐散於外者無數豈富貴家所宜乎又見貧賤之人所賴者有限固不能若富貴家之奢侈而喫飯

之後碗中尚有餘粒吃茶洗口遂將餘粒並棄於污穢之中洗鍋甑者不論有飯在內遂覆之於溝巷吾不能盡言而舉一二端以例之豈貧賤者所宜乎蓋上帝每道下民不敬五穀者當今年歲飢荒以戒之或奪去平生衣祿以警之若能敬之者使家賢富厚子孫衣祿長享玉皇之言若此吾所以明誓言之以爲爾萬民勸焉

警世文三則

茲值上元運會衣冠文物重新吾憫愚氓溺甚欽承

玉簡巡行東至泰岱之國西遊恒嶽之濱南北周查已遍後復返轡嘉陵况逢新序屆至又當五日佳辰前已諄言示訓無非挽救人心富貴貧窮壽夭多男乏嗣亨屯天心原有定見至公至恕至仁嚴密而不可犯豈容惡穢相侵人生如花 在樹能逢幾度青春若不力行好事空拋過隙光陰立身惟存忠孝莫負君祿親恩若逢雙親無恙承歡菽水兢兢若逢春萱兩化春秋祭奠關情切莫欺辱良善動輒賭勝相爭須念身體髮膚寸寸俱是黃金切莫瞞心自用欺天

何嘗欺人試看古今報應本身必及兒孫楚那重瞳
蓋世烏江一劍而傾更觀王敦悖逆百日梟首神京
孫伯凌人利已早已受報冥冥曹帥江南屠戮子孫
乞丐堪憐眼前多少豪勝而今殄滅絕門惟勸世人
學善守分無辱多榮退得一步自穩饒他一着何輕
守我清閒淡泊麤衣蔬食忘形天地默爲扶助神明
是敬是尊更勸讀書士子莫要坐望尊榮第一先除
口業冷言刺語堪驚持筆戒爲點弄代人搖舌鼓唇
得利雖然可快許多大害隨臨若還朝夕度日心機

只用半分蓋聞古道有戒曾曰爲富不仁更有輕狂
佻達不知天帝懲淫時或竊窺少艾尋花問柳無根
不知人非無欲縞衣綦巾可員切莫談人閨闈三三
兩兩成羣如此自作之孽天道報應分明時或衣食
不足時或貧苦飄零時或謀爲不遂時或顛沛忘身
時或刑戮不免時或晚遲利名一切皆由心造善惡
隨之而分不信撫心自問是誰無有天真多因縱欲
敗度仁義禮智不存聖賢許人悔過天心原自好新
豈肯栽培傾覆禍福本自無門若能改心自訟立心

玉潔水清猶如汗池蓮發泥滓不得相侵自能轉禍
爲福百事所作皆成堪歎俗風日薄獸心犬肺人形
是以飛鸞廣勸只欲驚醒愚人但能勉強振拔自是
福祿駢臻吾今再爲誥誡莫負一世聰明各各時加
警省前途莫問幾程神鬼常臨暗室願當實力奉行
羣生混沌罔識陰陽生來天則付之洋洋求龜問卜
空勞肺腸須知大造禍福相當若能反躬自責臨深
履薄恐惶閤室所爲不道人前故意誇張瞞心多作
不善還將志氣揚揚須知禍隨機伏絲毫報應昭彰

不必癡心妄想還當自叩行藏大道與人爲善一言
一行宜防勿謂善小不勉勿謂惡小何傷譬如積土
一簣自然高比邱岡前已諄諄示誠個個藐視吾章
須信隱微必錄到頭分別弱強不信吾言勸訓難逃
天律煌煌試看他年得失始知此日雌黃若能力行
好事自然轉禍爲祥文明丁卯佳會告汝仔細行藏
堂上雙雙白髮蓬門衣食誰將吾爲爾等再告讀書
閉戶安康莫待臨時悲憾怨天尤地悽惶此乃藥石
要語諸生當見羹牆

善惡皆在靈府明明不昧毫釐孽如身在日中行止不能逃影世有不明之事天無不報之條人能巧於機謀天更巧於報應諸惡莫作衆善奉行侍父母常加恭敬學事業務要精勤懼王法自然少禍謹節儉何用求人依本分永無煩惱行方便世代昌榮戒心性休生嗔怒凡作事三思而行

誠諭文

心如止水無風則全體虛寂萬象並現性同明月無雲則真面圓滿隨處周徧然而風無時以搖水雲無

心以掩月其故何也時昧方便之故每握善根之故輔世之法無過行善教人之方惟此學聖以何力而行善以何心而學聖徧震口雷於性天闡揚正教常轉意輪於身界守護大法書因讀而有聲錦添花而倍色或印經而廣傳或施法而教化或買物而放生或捨藥而回死一端善心在於聖境則諸天錫福衆神降祥心之所欲皆隨如意身之所行無不合法正人聖尊同比肩而敬仰邪神異魔摠發心而擁護所求之財寶所望之受用自然無礙不久豐足無怠厭

志莫負切意人根不同世緣各別或敬仙而斥儒或尊佛而排道或是儒而非仙佛或崇邪而毀正真廣持方便普應羣機恢廓度量各隨悅意每事同攝恒順彼心隨緣拔苦淨無我相一人信行百家模訓一國敬奉萬邦欽仰善惡之分由於人心邪正之混關於私慾奇幻之物是奪眼之賊眩妖之文非養心之方身不逐色何關花紅樹綠心不逐境無妨市北城南性本如是居於塵而出於塵妄本無常仆因地而起因地一念之善邱陵坑坎處處妙嚴一念之惡花

林泉石頭頭羅刹若能讀誦此書消灾降福又能奉行如說悟凡入聖吾本如天佑物無私爾須學聖廣濟有情

消劫啓運濟世勸善文

太極初判之時圓機活潑無有分別而真元妙性昭而且靈無物不稟無物不包周徧於十方真常於億劫自然妙理無有乎少欠無有乎少餘淳風厚俗大地同然慶星瑞雲上天垂象村有擊壤之老衢有歌帝之童一杯醇酒互有揖讓之禮萬鍾祿食元非富

貴之貪爲臣者不期忠而忠於君爲子者不期孝而孝於父爲弟者不期恭而恭於兄爲妻者不期順而順於夫熙熙乎皞皞乎和平之氣如百花之爭笑柔順之象似細柳之初眠南宮本無禍福之簿上天豈有刑賞之官嗚呼無始之人慾從三毒而發源業海之波瀾乃浩渺於三生苦哉苦哉誰使而然歟誰使而然乎第觀其受罪也或處地獄永無出期或受天罰自削祿籍或入劫運慘死刀兵或登丐簿寄生村家或母離子散相轉邱壑或病瘡飢寒彷徨道路者

誠不忍目見其悽慘哀切之狀其踽涼孤寡之貌以上天好生之心體而觀之則其所忍見者抑亦有誰乎噫如是者摠由於喪天理廢人倫不敬上帝不畏神明肆行淫欲甘爲萬惡之首永蔽孝心以杜百行之源取適於自口不顧父母之養取煖於自身不顧父母之養不合私慾則反脣於王法不縱恣意則逞臆於貧賤侮君上欺父母凌師尊奸婦女誣朋友滅神像毀正法辱善良主奴三教破殘六經穢字稍書賤物殺生之所爲也於是上天震怒設禍福之官置

黑白之簿善惡之大小賞罰之低昂昭昭乎不爽毫
 髮明明乎不違錙銖行法弟子可體圓全之本心利
 物利人爲常行修善修福爲常規在世期堯舜出世
 作聖真勿負上天無爲好生之德我今降乩於清虛
 靜室示戒於諸士學者虚心諦受勿以老生之常談
 置閣於案頭改者痛改守者堅守以陰隲文爲友以
 覺世經爲師心體力行行餘化導互相勸勉徹始徹
 終敬而勝怠慎於其獨莫負今宵教誨之心

諭清淨壇文

道光庚子歲降於灃陽重刻首士銳行子彭必材家

吾本張宿降生人間忠孝之心歷數世而不變上帝
 嘉吾忱一授上相職至今屢勸世人卽本境此壇開
 化日經月餘戊戌歲清淨壇諸神降經教人一月有餘語經萬餘隨人教訓言辭
頗多訓經百餘所降經文詩訓亦多卽慈航寶筏內所刻是也前言猶在也人
 心胡至此哉於今天貺以後降此諭是六月六日之後再幸適此
 不無漙心奈人心罔覺難以救度縱有慈航那見人
 同登上乘雖多寶筏只緣他衆從下流豈不知天理
 昭彰人生三光之下順天者存逆天者亡非上天殘
 害民命實以篤斯人好善之心也乃經訓羅列徒屬

空文卽報施影響止奉故事我也駕起九天身墜二里地係洲捧帝尊之命救民黎之生敢云虛衍經籍上干天怒下蓄人議哉胡神名一出敬之不暇神靈一退毀之旋踵苟祇承有心何取乎拜廟拈香對越在上無事乎侵物凌人蓋我之心田卽我之良田人之害物卽人之害生舉頭白日三尺神鬼伊邇佇目青天九重雷霆不遠天下爲家吾神不無此胷襟中國一人萬姓何生此嫉妬想人身難得樂土難生盍保全天命循行天理以長風化以善人情焉予不得

長驅遠民袖手不顧也於是作此以諭

戒溺女文

人稟天地陰陽賦形而成爲人最靈脫離蠢劫必須以上帝之心爲心庶不愧爲人生於天地間也夫上帝之心何心也好生之心也慈悲之心也廣大之心也萬物一體之心也邇來世人無故溺女無故殺兒爲大不孝是殺天下人民也人心殘忍莫此爲甚而甘觸上帝之所怒蓋人乃父精母血妙合成形十月胎足男女始生胞血淋漓有口怎言有手怎救有足

桂宮記 卷四
怎逃胡爲置之死地吾聞溺女時慘何堪焉有以便
桶水泡而死有用胞衣封其耳目口鼻而死有用薑
酒灌其口而死有以木壓其喉而死種種惡極禽獸
不爲而人爲之狠忍何堪至此天乎天乎寧不令人
慘目傷心天地施無窮之恩生之人自懷狠毒之心
殺之上干天怒下觸神祇順天者存逆天者亡孟聖
之言已昭著於當時而人置若罔聞殊堪痛恨溺女
之家百行莫贖溺女之夫婦天地不容雷霆震怒萬
劫難消試思上而天子聖神賢哲下而人民傳子及

孫無非未溺之女所生而女豈可溺乎邇來溺女者
有因無嗣屢生女恨而溺者有因嗣多復生女厭而
溺者有因厭貧而溺者噫嘻人何昧也無嗣者正宜
修積陰功培元固本方可望嗣以承宗接祀乃絕其
現生之女而妄想未來之子安可得乎嗣多者正宜
廣積善緣以福其子孫反造此彌天大惡吾知汝命
多子必因此而奪之也怨貧者未必因生女而遂貧
也而貧女亦未聞有終身難嫁者也按溺女雖由婦
人之手皆因不明於理故淺見妄爲究係男子素昧

理道於平日不能委曲以開導之則其惡不獨於婦人而在於爲夫者之惡重也故上帝諭曰尤於爲夫者有專責云富則玉樓削籍貴則金榜除名壽命從此天子嗣從此絕可不慎歟今勅南斗鑑生高元帥北方飛天魔王統領神兵巡行天下刻刻鑑察如有溺女之夫婦奪其紀算以橫生逆產水火雷擊或殘其目折其手足使其顛沛流離疾病繇纏至死入無間永不超昇者也嗚呼反問爾身何來見吾此章而不動念者非人也爲夫爲婦見吾此章而不痛心者

禽獸不如天地斷然難容人人得而誅之者也諸子力行刊刻廣傳叮嚀勸世富則玉樓註籍貴則金榜列名壽比南山子嗣從天而降陰隲之言豈欺人哉

禮神明文

咸豐乙卯正月元朝降宣于公善堂

嘗謂君子淑身以禮非禮則不行焉聰明正直曰神神其所明明其所神以默運天地變化之機者也禮之施於神明者猶恐浮僞之或投而豈得以無禮者爲之褻而爲之瀆乎夫神明者正氣也神爲正神加之以無禮則慢神神豈弗爲鑑乎蓋人狃於素習而

不知禮之爲重往往負咎於神明猶靡識顧忌若謗聖若毀賢欺神滅佛種種無禮之極原其故皆由禮之不明而不知神明之當禮也至若祭祀豐潔享儀精緻升降拜跪要不過循其禮之迹猶未得其禮之微有子曰禮之用和爲貴和何言發於天理之實際而非矯强者流也以此而禮於神明神必鑑之而據之感格乎幽明潛化乎陰騭福祿來臨而禍患可遠矣奈何愚頑之流僅知神明之當禮而究不知從何而禮禮發於誠誠則明明則欲念不纏勉強不事心

能有禮則無往非禮亦無往非禮神明而禮貌趨踰殆非虛文也由是寤寐有神明而身禮焉隱微有神明而心禮焉動靜舉止無不皆然此禮之所以非外飾而實真性也神之格思不亦宜乎神其庇之有不應乎此禮神明之真詮也

宏敷文

今夫吾道宏敷歷億劫而彌煥神功丕著聿萬世以常新秉盛德於當躬久示修爲之路垂鴻謨以度世大開遷改之門念切人倫闡孝經於七曲提携聾聵

降救劫之全書一十七世之簪纓仁民利物九十八
化之變現輔國宏文主宰文衡原獎行修之善士權
司祿籍端錫孝弟之仁人發大慈悲心飛鸞開化於
在在極宏拯濟念如意消劫以生生覺世牖民傳寶
誥於千世百世掄才錄籍秉精鑑於文場武場福善
禍淫桂宮之勸懲不爽紀功錄過棘圍之取舍維嚴
普勸寰區衆類須懺悔之皇皇慎勿辜負叮嚀或聽
聞之藐藐登覺路出迷津仙真可望勤誦習誠宣化
福祿無疆

諭洗心文

吾道德圓通掌三十三天之仙籍陰陽主宰管七十
二獄之幽都巡察人間善惡賞罰不爽於分毫紀錄
世道過功權衡皆歸於至當陰騭文一篇括盡生人
要旨救劫章數語說透宇宙病根今復飛鸞顯化挽
既倒之狂瀾降筆垂書開斯人之覺路亦謂世運波
靡之際舍此斷難為功人心陷溺之秋無斯亦難為
力此吾救已往望將來之意所由來也無如師儒之
道不與生民之真大昧致陷溺日深愈趨愈下皇天

震怒災難頻臨武帝本憂世哀民之心存悲天憫人之志不忍蒸赤淪亡邀呂帝與吾興此宣講宏開飛鸞一法闡明聖教丕振儒風宣示王章重整綱紀令讀書士子咸知正己化人草莽之人共識愛親敬長一切機械變詐之習由此潛消光明正大之行因而復見然後人心正而風俗醇風俗醇而世道昌世道昌而天災弭矣武帝之法不誠爲天地維正氣乾坤保精醇國家勳盛治斯民復性情歸於盡善盡美也哉而世之僞儒末士竟有疑之議之阻之毀之此其

心果何居也大抵邪正不並域義利不同居若人非不知宣講之善而心所注者邪身所行者利舉動犯乎王章行止趨乎歧路考其事則利已損人聽其言則談閨道闡以故聞聖諭則心赧然聆善言則心又翻然而談敘紛紛矣嗟乎士人若此世道尙何言哉吾今開方便之路示遷改之門世人若能洗心惕息革面皇皇懺既往之愆積將來之福則民安物阜俗厚風醇而聖人之道復振矣爾世人其無視爲具文而不急急爲警省也勉之凜之

敬祖宗文

星辰繫之於天草木長之於地人之身生於父母而其本則實始於祖宗此木本水源之義古仁人孝子所爲亟亟焉而不敢或忽也甚矣祖宗之不可不報也吾特與世人申言之思祖宗當日畢世經營一生計慮其所以爲子孫謀者慮其衣食不充而身受饑寒也則思有田產而遺後慮其終身愚賤而不能發達也則冀讀詩書以振家如斯二事勿論遂與不遂而爲祖宗之心皆同而爲子孫計慮之心亦已苦矣

又其甚者見人子孫之起爭端也則以和睦之訓示之見人子孫之不類也則以爲人之方囑之嗚呼祖宗之致意於子孫無不盡而子孫思所以報之方恐不足酌其德也奈何今世之人不體祖宗之心大負先人冀望之意日食祖宗之德竟忘前日創業之難年節生忌靈前無祭享之禮春秋屆值塚上鮮拜掃之忱更可厭者貧塋寂寞每託省墓之無資富塋遠阡又謂跋涉之不易以故墓生荆棘則忍不知修墳土踏崩若了無干涉嗟嗟有子孫之墳塋至此何異

絕塚有子孫之先祖於斯竟爲野魂悲夫至於惑意風水則以枯骨求利名妄自葬阡何嘗經心於祖穴若斯之類忍何如也如此之人罪莫大焉吾主掌籙籍考察善惡較量功過每值臘月廿五命北帝下界考核天下墳塋四時拜祭者加以功不拜祭者錄以罪其罪與欺凌貧賤宗支嫉妬富貴族人不念祖宗一脈不遵聖諭雍睦之訓者皆以絕嗣之報加之以彰天道循環之理至於士人素無大惡而終身落寞亦是因此而致吾今剖明因果諭爾士民慎勿甘心滅祖而爲天律所不赦

敦倫文

蓋惟人倫爲聖賢之極大節爲明教所關人受天地正氣而生須還正氣於天地人倫大節天地之正氣而亦生人之要著也吾見抱義捐軀殉公所以報國全節奮志殺身卽以成仁勢處艱難尋老親於異域時值危亂矢孝德於他鄉敦人倫之至極立大節之芳型爲人若此則生可爲完人死可爲名神朝廷旌表萬代後猶薦馨香州郡稱揚千載下咸陳俎豆落

本宮記 卷四
落孤衷皇皇正氣名垂竹帛蹟著金編允推如是人
矣世之爲人者務敦人倫之重持大節之原不可與
草木同腐埋姓字於荒邱流俗同羣隳聲名於後世
鼓舞振作砥礪潛修又何大義大節大孝之不可至
哉嗚呼我是以讚完人

欲貴子須積德文

竊以桂院名標祖宗之德澤先富杏林香暖陰隲之
行修必深淵源繼美科甲延繇此積德之驗也獨怪
世人不知本原徒徇末務有子而罔識栽培任其折

敗居身則肆行奸慝猶冀後昌豈知佑啓無片善之
流籍由何發詒謀無寸功之積貴自何來所以陰行
有虧三榜之顯榮已黜功德未至二甲之待詔無從
至若五桂聯芳祇緣陰功浩大一子鼎甲實因救急
慈仁往事俱載善惡昭然欲貴子者當知所從事矣
夫何愚昧者流不於德行必之而乃於僥倖求之不
於性分培之而乃於虛妄竊之愚何如也謬孰甚焉
須知以吾德而求子貴皇天決不負有德之人况古
人之獲報可證吾無德而望子貴桂質豈能產薄穢

之地使梗頑萌微倖之心是故桂錄嗣籍錄有德之
純士丹書天榜書長厚之仁人所謂皇天無親惟親
有德此誠理之不易勢所必然也欲貴子者其深思
之

富貴原從善感來文

人世豐亨之境安然而得晏然而來世之人夢夢置
之紛紛議之究不知其何所而得何所而來殊不知
皆善自種之耳如人生享豐厚叨受顯榮富貴其豫
然矣然烏知其何感而得此其祖宗之積累也久其

自修之培植也深善根宏茂富貴環來感應其神焉
已何世人貪心妄想種種怨尤咸亟亟以求富求貴
而不修其本原田栽荆棘妄冀禾收是人之謂也嗚
呼苟富貴而不從善積來雖得之亦旋失况毫無善
行而猶望希冀乎吾願未得富貴者積善以培之修
善以求之則富貴可得富貴可享復願業處富貴者
宏善量以固其基大善域以緜其澤則富貴可常享
富貴可不墜求耶希耶可惺然矣世之欲求富貴者
其以善爲衡以善爲本自可進大道而不陷於深山

野壑矣思之勉之

訓士子文二則

甚矣德之不可不修也竊怪今之士人名爲儒雅不思敦本務實以無愧聖賢往往恃智矜才期功名之倖致詎知名之一途乃上天勸善之據或取或捨其權雖自人間操之而實不自人間主之何也正士讀書明道淡泊修身其心亦非羨慕乎名者乃無何而中魁榜登黃甲蜚聲翰院不啻操券而獲豈名之可倖得者而其人卒得之又有弱冠英流才華素著人

皆謂巍甲高科易如反掌乃無何而被黜者卽其人下第者卽其人潦倒終身迄無長進豈才之無用者而非無用也斯二者皆歸於德與不德而已矣又何論乎才與不才哉然而天非不重才也然而天且深愛夫才而深望夫才也彼夫茫茫六合之內癡愚蠢鈍者不知凡幾而獨以造物鍾靈不惜焉予於士類以成超凡異類之尤此何等之愛哉愛之深斯望之切矣望者何修之於家冀其體道立身篤志聖賢以作斯文之砥柱達之於上冀其致君澤民本乎夙昔

以臻邇治於平康才也善用之有如是之宏遠也乃
不以正大自期而專工筆硯不體天心培植而日就
下流天不重才由士人之不自重也吾主宰文場權
衡士類每值科試先命天下城隍察奏士籍有德者
不惟錄之於鄉註之於會而又榮之以位錫之以祿
此吾之所以厚待夫有德無才者正所以勉勵夫有
才無德也抑亦深望之至意云爾嘗見士人久困文
闈未能反已自責每每怨天尤人窮愁抱恨以死於
棘闈矮屋中猶茫然不知悟良可憫也吾今深爲不
忍大施仁慈剴切指示爾士人其勿負此才而急急
以修德焉予有厚望也

惟天陰隲下民降祥降殃初無爽於毫釐或予或奪
悉持衡於隱微吾自龍漢以來歷劫濟度累世行修
一十七化身救末劫於奕禩九十八顯應受大洞於
天王復蒙天帝勅以上德真君同中書門下平章事
位證文昌權操桂籍司人間之善惡定士類之科名
選拔奇尤魁斗中首重孝弟紀錄事實德行全備始
論文章果其行芳志潔自然實至名歸倘爾喪德矜

才終必身敗名裂此一定之理卽吾選士之定衡也
嗟嗟吾自飛鸞開化以來勸勉之言幾爲充棟體貼
之士罕有其人以致士風不正斯文就衰師道不端
後學愈僞所以世道澆漓人心變詐皆由士子階之
厲也然而尤可冀者聖諭十六條言文而直衍義數
千語意簡而該被其化者共知人倫之大服其教者
咸抒載德之忱豈不懿歟無如奉行不力士子每視
若虛文振作無人小民悉昧乎天性世道至此無可
望矣何幸於數年之間大行宣講以補王化所不及

挽人心於將墜真救劫之金丹濟世之寶筏也爲士
者誠能身體力行作鄉里之模範省愆修德樹衆類
之觀型勸一人以至百人化一方以及萬方將見惡
氣潛消善心發見堯天舜日之休風拭目可待歲稔
時和之治化屈指可觀猗歟休哉

選士文

吾奉帝勅顯化人間糾同諸部率領衆仙考較善惡
判別忠奸有功者賞積惡者殲彰瘡不貳予奪維嚴
奈何世人本性變遷不忠不孝無禮無廉欺誣詐僞

相宮誌 卷四
鄙吝貪慳不修善道日積罪愆奸邪欺詐尤而效焉
端方正直譏毀無邊大綱顛倒惡焰盤旋腥聞在上
觸怒皇天水火盜賊疫癘烽煙武帝呂帝同吾潛然
飛鸞開化喚醒癡眠垂書降筆玉字金篇今復重誠
諭爾閭閻惟善爲寶勿造孽冤萬惡淫首百行孝先
陰功陰德黽勉曲全體行斯諭自造福田錫祿增壽
科甲蟬聯輕褻毀侮敕令森嚴雷部火部誅殛殄殲
誦持傳印免過消愆久行不怠福澤延綿

科場選士勅令文

一大倫無虧德行優全者錄一淫殺不犯言行端謹
者錄一廣行陰隲諸惡悉戒者錄一善教子弟昌明
聖道者錄一謙和忠厚仁愛公正者錄一苦志勤力
淑身積學者錄一時行方便改過遷善者錄一敬惜
字紙欽重經典者錄一敬刊善書流傳勸世者錄一
禁絕淫書不假刀筆者錄以上勅令係吾與桂籙諸
真重行酌議奏明天帝奉旨欽此今時奉命宣示人
間布告諸士咸使知聞

諭公善堂諸士文十九則

持重孝弟敦篤大倫陶鎔學問涵養性情勿虧損勿
缺限則前愆可贖績可紀矣時加儆惕慎勿失足張生

體行善言常行好事以造結局洪生貧士貴能立志家

庭之內須善體親心事為之間均宜端正汝其遵守

哉王生宜遠器識益學問絕六淫敦倫紀以贖前愆勉

哉張生人生所重端此身耳倘不守身則傷體傷體必

辱親倫常負罪莫甚於此今後宜以養身為要洪生敦

重倫常持守孝弟能於此地立功即是第一大善况

既為士須以品行持身稍有不類名教之罪人也此

後宜養性修身始無慙於德行楊生夫仁人孝子未有

不樂父母之具慶而序天倫之樂者也人道不幸方

事鰥寡之父母人子此時於孝道內雖敬謹勿忘朝

夕盡孝猶恐不能慰孀母之心吾今諭汝汝須刻骨

銘心時常省察安孀母之意立人紀之維愛弟敬兄

治家有法方不愧為士之名為子之道張生百行萬善

五倫為先五倫之中孝弟為重孝子當為純孝弟道

須極悌弟勿生欺心勿萌矜志能乎此可謂善矣勉

之王生人之一身惟貴立志不立志則落於庸流鄙俗

矣吾今訓爾須以善書格言明其心志敦重倫常切
不可因婦言而違孀母能如此則善自積矣倘稍有
虧損有慙人道天罰弗恕也彭生讀書非求名乃明理
也乃明五倫之理也蓋五倫之道守身為大不能保
身則陷於忤逆矣此後務宜保身持守孝道吾諭張
生之言同病者宜讀遵吾所諭自能集福李生寒士之
要立志為先勿為威懾勿為利誘方不負為士也倘
稍不立品世態炎涼則落於下流矣士患患貧而患
道不精吾諭汝乃成身之言汝其肺腑銘之何生宜消

俗氣而造雅量處人以尊處己以卑孝弟持身敦守

樸質方是受福計也

洪生

為好事聽正言以化庸愚以

束心性楊生敬天地先敬天後敬地若順地乃逆天也

凜之

何生

洗滌前非善事孀母勿順婦意能若此可寡

過不然天律不汝寬也凜之

王生

須學好事須聽善言

聽則行之學則守之勿生佞心宜存寬厚李生立志守

身多行善事自然集福矣

李生

須讀書以明心守禮以

定志勿邪僻勿奢華其各守之勿悖吾諭

李生

戒無相壇諸土文二則

道也者性也性也者心也心也者斯人之不可須臾
離者也是故善亦心也惡亦心也何事何物豈有外
此心者乎夫心之爲物至虛至靈造化莫測惟存乎
斯人之所措如何而已矣若人隨事而變逐境而馳
小有懶意則百妄爭入萬邪交出起心滿傲動念貪
欺如此之人不知貞恒之不改而猶懷野猿之舊習
者也可曰惡人而非可與之人也隨事而應逐境而
接小無懶意則天理泰如和氣冲然運作中禮行術
合法如此之人深知神聖之可畏而能養水牛之新

步者也可曰善人而真可與之人也噫噫哉上天旣
生其人而降衷則又何有善惡之相反者乎蓋善惡
者皆人之自爲非天理正大之所相關者也然自古
以來行善之人小作惡之人多者何也先天四正之
氣易而後天四維之氣代正陽衰賓陰盛故也是以
聖人出而教導之以之補成於是乎人事參于天文
地理之間以成三才之道矣方今禮樂崩壞世俗頹
敗三代之教不可復作故予特與伏魔孚佑兩聖飛
鸞開化期救斯劫已於中州示靈指教旣曰可徧而

獨於此土惟知伏魔帝之聖而亦蒙帝恩賴以安邦
家永禩之基崇奉備典猶昧於神道設教之理予之
始來也無以現跡于居人故令人扶鸞訓誡之若干
矣幸因諸士之虔誠又示若干經傳而夢授現示無
所不到以及詩以諷之箴以規之期望諸士之玉成
諸士玉成則此土之化不期然而油然而自行矣又何
必有訓有誡也乎已示之經傳不爲不多今又諄諄
然戒之不已者爲念諸士之心或變馳于妄邪之間
漸昧於本如之性故也諸士亦爲念予之苦心持心

如止水明鏡無一毫危險之行則多幸于導化之機
也大抵其人善則善雖未彰藹然春氣莫之禁也如
玉光不加耀而人同愛之况其已彰者乎其人惡則
惡雖未形劃然蛇毒莫之藏也如鷹聲不加大而鳥
共惡之况其已形者乎然論其體性則有何毫末之
異乎只因末流之放與不放耳是以聖人有求放心
而已之訓且惡雖已彰於事爲之間改之則善聖人
又有改過之許矣受天地弘廣之德得聖人通明之
道形人之形而行禽獸之行則豈不惜哉可無恨乎

若有改過之人則予將曰非但許之猶勝於純善云
惟望諸士誠心改遷以安予心而誓開蒼生將進之
路如此提撕之後更無重言益讀三教經傳而勿以
悟解爲貴必思所以體認日孜孜不已焉不已者望
道見道之行裝文王所以自得乎道者也

夫此心苟或放肆則作爲必從放肆中出不知其僞
而行自僞矣是以君子正心以就大道心正則運用
莫非正心中出故不知善而行自善矣幸望諸士持
戒於一心上乾乾無怠而終身焉道有可悟之日則

非大道而不可謂之悟也事有可了之日則非善事
而不可謂之了也天地之互環豈有或息之時乎息
則非也日月之相行豈有或停之時乎停則非也人
能則之可容於覆載之間矣夫不可息不可停者抑
何事乎惟此至善而已矣至善之道備載於經籍諸
士勤讀經籍探奧拔旨而徹頭括尾期得聖人之大
法而卽復自性之淳理則豈不悅乎壇下諸士皆有
可責之行矣予不忍斥言人非而如是傍醒焉凡有
過者洞去前非亟就新德勿招時人之謗蓋騰謗之

由皆自己之愆之故我既無過則謗何從乎無疵之皮雖終日吹毛莫能求矣諸士以無疵皮爲法終持焉諸士之無違予日望之

立德莫先修身文

甚哉身之爲大也不可一日忽之不可一時玩之試思古大聖人皆此身也莫非不負天之所賦而已爾等懋修之下當以身爲聖賢之身不可爲退縮不前之身道不遠人人之爲道宜慎其身焉而已
不爲淫書所惑文

且夫淫書之爲害大且深焉作者傳之傳者刻之閱者迷之白茫茫大地竟成一淫亂之區也試思人具五行之秀爲萬物之靈因紙上風流無稽之巷語迷其心又迷其志真不知身之爲貴也可不惜哉爾等其勿爲此惑

訓希聖堂諸士文

訓梅卿汝本清雅之才切不可爲流俗所染第一要也務須勤進修途不可暴棄功名可望第二要也汝書法極有天資從此加功自能獨映當時第三要也

汝父母在堂實屬天倫之樂務要盡心孝順第四要也汝交友務須擇輔仁者不可泛泛於聲氣第五要也

訓 古廉 汝素朴老無甚可囑但有三件宜遵汝素好安靜然不可懈怠修途一也汝素好清逸然不可無志功名二也汝雖事春萱無他錯然宜再加孝為妙三也

訓 琴緣 汝正在有為之日不可負有為之時然有五條宜遵首莫先立一個志如樹木無根不能發葉汝

先宜立志次汝要治心不可用一心於此事之中又分一心於彼事之外汝次要治心三務須斂神不可以邪穢污之淫詞小說切不可看四要正氣五務須誠意不可始勤終怠尤宜知修心為重五要誠意

訓 曠才 汝本性剛烈自宜收斂汝本性嬉遊切宜改悔汝本性魯直切宜澈明汝本性滯塞尤宜擴充最宜務者帝君大聲呼之曰孝弟

訓 錄存 汝生前命薄一蕭僧也切宜保守此清淨之

身是從身上修德法汝生前乃菩提之心今世不可
易爲聲色貨欲之心是從心上修德法非禮勿視非
禮勿聽非禮勿言非禮勿動是從耳眼鼻舌上修德
法獨居一室如十日所視十手所指是從幽獨上修
德法汝欲修德莫忘此訓

訓

那仙

汝雖云無踰閑蕩檢然年未及冠終身尙在
一已之作爲但以汝之性情可謂不矯俗不同流少
年之操持爲可觀但爾心緒多思切宜速改尤宜了
了世緣明明志趣所可議者未能寡思脫塵也汝能

永久不改再寡其思以脫其塵其庶幾乎吾且爲汝
望吾再與汝一字曰孝

訓

秋岩

秋岩爲七人之冠者得那仙之品行得鉢存
之誠實得梅卿之才慧得驥才之剛直得古廉之朴
簡得琴緣之梗概六人之長皆有但有一事未能脫
開世上之俗緣未了切改

撫躬文

予自開化以來世界已經歷徧世道已曉其顛富貴
功名常營謀於內念孝弟忠信竟淡漠於中懷豈知

吾掌人世之文衡所錄者忠臣孝子所削者奸佞邪
流富貴功名莫不由孝弟忠信來也何世人只知富
貴只圖功名孝弟忠信毫不加意已失得名獲利之
本雖有千計萬計而名利終不得如志矣與其不能
如志何不撫躬自問名利果何由得哉

諭諸生檢身要文

諸生數月勤勞已將成其事不日書傳此段功德不
可量也予自飛鸞開化栖栖者二十餘年矣每見立
壇之時沉心靜氣亦知省察但壇一徹不復如初矣

諸生有心向善不可如此我有數條平日檢身功夫
臚列於後有改無勉共當懍遵

一每遇清晨夢醒之時務須早起起時先念感應篇
或陰騭文覺世經等或祇念一篇或三篇一篇念數
遍不可久臥衾枕致使志氣昏惰尤不可枕上胡思
總宜養平旦之氣爲要

一念畢不可棄諸度外務須捫心細想那樣錯處我
有否那樣好處我能否務須思索一番否則讀亦如
未讀

一起後各有本業無拘作何生理皆要平心不可稍存貪想或稍存虛偽一日作事皆當如是若讀書者每早就晨起清氣心思尙整未甚與物相接總屬心志不紛將性理諸書詳加玩索或讀中庸亦可務要於精微處求之不可畧觀大意

一是日或有酬應不得不到者務須到則便了不可在外宴樂流連或戀嘉餚而不返或貪美酒而不歸或因有良友牽纏不得強回者要必須設法支持萬不可乘醉而歸大失儀節

一是日或有良友相邀不得推卻或觀劇或閒遊或詩酒聯歡或風月酬唱必一概不去未免太過人情必須擇知己者邀方去若聲氣之交萬不可同流或宴會等事準以二更必要歸有父母者免使懸掛無父母者亦宜早早安神因何空耗心血

一每當睡時不可太晚未睡之先再將感應篇諸書取出誦三四遍細想我一日所作事故過幾何功幾何有功無過者固佳萬不可有過無功若能依我功過格立一日記錄尤佳細思已畢然後就寢所作事

或有功或有過有功則來朝更加勉勵有過則來日痛加改悔心念念者惟去欲存仁而已卽當睡下自然夢穩神安

右數條自清晨以至晚自然有一定功夫此檢身之要果然如是求則得之求道者自然卽見本來爲學者自然功修益進爲生理者自然命運皆來壇下諸生自慎

